



桂宮誌

五六

ハ 6
2477
4



卷 6
2477
卷 6-4

桂宮誌卷之五目錄



天禽編

鳳章函

醒世救劫寶誥

命纂功過格書論

命彭定求宣示三則

戒問吉凶禍福示

全孝心法

新示格言

叮嚀警戒章

鸞語函

鱣壇語錄十二則

廣化語錄

觀心齋語錄三則

玉詮語錄四則

天源函

三教歸一論

桂宮誌卷之五 天禽編

安南徐 珽彙輯

鷄林李培根校訂

鳳章函

醒世救劫實誥

道光十一年辛卯六月十六日

天地一大父母也父母之于子無不愛天地之于人亦無不愛也天地之于人無不愛則必使人人飽煖人人安寧人人壽考也然而飢寒者不免危難者不免天折者不免斯亦慘矣而又兵戈以戕之瘟疫以



戕之旱乾水泛以戕之死者血流尸積生者東奔西馳困苦千般顛連萬狀嗚呼天地誠何心哉既生之而又殺之或且怨天地之不仁而不知天地實有無可如何者人悲之天地更悲之也人爲人悲天地早爲人悲也天地爲人悲天地不能爲人宥也何也凡此劫運人爲之非天地爲之也非天地爲之天地何能爲人宥也人自爲之人又何得怨天地也何言乎人爲之也人之所以爲人者理也理亡斯人亡也爲臣者不忠也爲子者不孝也爲兄者不友也爲弟者

不恭也爲夫者不義也爲婦者不德也爲長者不惠也爲幼者不順也爲師者不嚴也爲友者不信也士競文藝而忽德行也農圖良田而昧心地也工作僞而弗作德也商見利而弗見義也官爲家而無赤心爲國也吏爲私而無實心爲公也理刑名者亾善俗之遠猷也司教訓者昧明倫之先務也僧道滅綱常而傷風化也娼優棄廉恥而盡愚頑也隸卒假虎威而盡編氓也豪強肆鯨吞而凌寡弱也雜流矜奇異而藏險心也游民結黨邪而逞陰謀也邪淫者比比

也奸詐者多多也腥聞在上黑氣觸空是以劫數定而災害臨也然而天地甚愛人非遽以災害戕人也其始亦望人悔過遷善消此大劫也是故春之元教人以仁也夏之亨教人以禮也秋之利教人以義也冬之貞教人以智也日之吳月之食教人以持盈而戒滿也雷之迅風之烈教人以恐懼而修省也人有不明之事斷無不教之條如一切飢寒危難夭折之迭出錯見者無非欲以小懲大以一警衆也使人人能體天地愛人望人之心而悔過遷善何至大劫臨

頭如此其慘也惟天地厚愛人而人不知天地厚望人而人不覺惡業太重惡類太繁尋常災害掃除不盡而大劫始臨矣兵戈所不及者瘟疫以戕之瘟疫所不及者旱乾水泛以戕之嗚呼天地誠何心哉吾奉上帝命飛鸞開化所以正人心而救大劫者無不至矣而人心卒不可正而大劫卒不可救甚矣人之迷也迷于前吾猶冀其悟于後故茲于大劫既臨之後諄諄爲爾世人言之使爾世人知天地之愛人如此其深天地之望人如此其切庶乎大劫之不能救

于已往者猶或可救于將來也爾世人其速速悔過速速遷善勿負天地厚愛之心也勿負天地厚望之心也其遭劫而死者愛之無可愛也是自絕也其遭劫而未至于死者望之猶可望也宜自新也其未遭劫而安享太平者天地厚愛之厚望之也宜自省而自修勿失愛而失望也慎之慎之一言恐天地聞知也一行恐天地見知也一念恐天地窺知也人可瞞天地不可瞞也人可欺天地不可欺也天地在吾心吾心卽天地也時時不昧心卽時時敬天地也吾心

時時敬天地天地卽時時佑吾身也天地時時佑吾身則百福駢臻千祥雲集又何災害之不可弭劫數之不可消也世人見吾訓者其思之其細思之爲愚夫愚婦講說之抄寫而傳送之刊印而廣布之勸一人善準五十功勸十人善準五百功造福良非淺也

命纂功過格書諭

爾等遵行功過之格內中不無差謬但此亦緣欸目未清條例未詳之故初行猶可恕也現今衍子將三集格書纂成一集立則甚善然所纂者速望衍子會

集同志願竭心力者同至嘉子書齋聚首一堂將所纂之格彼此校核細心查閱贅者刪之闕者補之庶獲萬全無弊而編定之日各自抄寫一本以便遵行自此力行者心內了然差謬之失則可免焉篇首仍望衍子將吾顯應至斯緣由併爾等誓行志向作序一篇以令見者感悟其諸費用文子總其成嘉子為之輔日後倘有同志捐貲刻印施行於世其功莫大於是如此即義乃精而學乃正之意云爾

焚疏
內語

句係誓行
功過格默

命彭定求宣示三則

吾為士大夫一十七世未嘗不孝父母不忠君王不順師長不信朋友不恤貧窮不護愚魯不以富貴驕人不以才能炫已不以聲名奔走四方不以事功侈傲鄉黨一惟以謙和柔順誠敬居心廣積功德力行善事故能永脫輪迴直登道岸今司考校士子功過以定黜陟汝等皆知敬我不知敬身皆知事我不知事親皆知奉我不知奉君種種罪愆士子尤甚豈不愧於聖人之教乎吾故命彭定求宣示吾訓今後士

子有志功名不徒在幾篇文字用力也不徒在臨考
奔營也不徒在求關求節以干王法也不徒在沽名
炫美而結社結盟以延聲譽也人心可欺上天難昧
我已洞察士子之居心矣早已洞悉士子之行事矣
早已洞見士子之五臟六腑矣功名之際得失遲速
不差毫髮不差時刻不差斤兩者也爾等何爲終日
讀書不知書中所說何事所當行者何事所當戒者
何事惟自爲而不爲人惟務名而不務實惟好利而
不好義不知孝弟忠信不知禮義廉恥身列衣冠行

同狗彘捫心清夜恐亦難安尙欲妄想功名乎所以
聰明俊秀之子少秉英姿至垂老而沉淪淹滯所以
豪華貴介之胄父兄蔭庇而沒世不離銅臭所以單
寒勵行遂至青霄所以薄福短年而挽回造化所以
貧窮孤苦終受榮華富貴不在天也死生不在命也
士子各宜猛省吾言無視爲老生之常談也彭定求
頗能知此道理我故降乩其家命其廣勸此我一片
婆心也特諭

吾爲士大夫一十七世何嘗不以濟人利物爲心何

嘗不以功建名立爲事何嘗不以爲善去惡爲務何
嘗不以修性養心爲要何嘗不以敦倫知恥爲先何
嘗不以事君事親爲重何嘗不以友于兄弟爲宜何
嘗不以夫唱婦隨爲切何嘗不以朋友切磋爲樂何
嘗不以淡泊寧靜爲安何嘗不以剛方正直爲性何
嘗不以我子我孫爲本何嘗不以已財已物爲輕何
嘗不以我死我生爲大何嘗不以我榮我辱爲微何
嘗不以我功我罪爲實何嘗不以人是人非爲緩何
嘗不以我得我失爲數何嘗不以人得人失爲情何

嘗不以我宗我祖爲急何嘗不以人宗人祖爲殷何
嘗不以事功德業爲任何嘗不以性命宗旨爲歸此
所以爲形神俱妙與道合真也此所以爲更生永命
也此所以爲九天開化也此所以爲司祿職貢舉真
君也此所以爲儒者之宗師也此所以爲道法之尊
重也此所以爲天人之敬仰也此所以爲萬世之那
儀也可爲世人言之毋不孝父母不孝者罰毋不忠
君王不忠者誅毋不尊師長不尊者責毋聽信婦人
言語牝雞司晨惟家之索也毋燕溺匪人德行言語

可師乃可交也毋妄造淫詞誘人爲惡壞盡天理也
毋淫人妻女女子之身節操爲大也毋輕信奴僕造
作是非皆此輩也毋縱慾房闈好色者伐性之本也
毋貪於酒食哺啜者肉食可鄙也毋鞭扑吏民王政
以仁愛爲先也毋離間親朋天道以和平爲善也毋
違聖訓毋逆師言毋背王章毋干天律不可以吾言
爲平平無奇而視爲弁髦也彭子其力行之彭子其
與人共行之乃我降乩之意也

吾一十七世爲士大夫未嘗一念驕人未嘗一念欺
人未嘗一念昧己未嘗一念縱己未嘗一念是非顛
倒未嘗一念始終有間未嘗一念爲善少忽於細未
嘗一念爲惡不禁於微可以爲親之孝子可以爲君
之忠臣可以爲家之祖宗可以爲國之柱石可以爲
士之師表可以爲民之父母可以爲百世之敬仰可
以爲萬法之宗師可以爲天下之擁戴可以爲上下
之尊崇可以爲遐邇之法則可以爲貴賤之憑依可
以爲幽明之均賴可以爲男女之儀型也吾言止矣
一而再再而三第一條者爲功名之指迷也第二條

者為德行之格言也第三條者為功成之效驗也但人不知者謂彭定求之代筆也謂彭瓏之潤色也謂其矯情干譽以邀天報也謂其是已非人以謗同學也謂其疑神疑佛以涉癡迷也果有如此言者吾使其貧賤終身斥其祿秩削其壽算禍其子孫耗其財物喪其骨肉加其疾病也彭子無恤人言毋徇俗情上天賞罰豈爾士夫所能主宰者乎

戒問吉凶禍福示

文子聽嗣後求爾扳鸞者不可以吉凶禍福禱吾案

前蓋欲知此情由宜向心理二途問一問甚是明白何則凡存心有合於理者則是吉也福也行事有愧於心者即凶也禍也何得不自省自悟以干多瀆之愆况吾屢頒示訓原望行避凶趨吉之事存親福遠禍之心倘又數數求吾直示何須沽一向善之名哉

全孝心法

人在氣中如魚在水中父母口鼻通天地之氣子居母腹母呼亦呼母吸亦吸一氣流通已無間隔何况本靈本覺乘氣出入者又何有界限處可見此身不

但是父母遺體也是卽天地太虛的遺體保養遺體之法不過馭氣攝靈一事馭氣攝靈不過愛敬二字愛之極爲敬敬之至爲齋齋戒洗心到得浩然之氣塞乎兩間赫然之光照乎四表方纔是個全孝方纔叫作孝子這是極平極易極庸極常的道理如人目能視耳能聽只把做平易庸常使一生盲聾的人忽然得此便大驚少怪誇張神異然究竟來只是平易庸常如何添得些子且世上有五等人孤子義子失怙之子爲人後之子與中貴人他恨不得親事父母

殊不知此身旣爲太虛天地的遺體難道不是君父繼父繼母的遺體昔日王祥輩但一心孝順繼母就有許多靈應豈是那繼母生下來至於孤子有乾坤有君師有宗廟隨在皆可盡孝隨在皆可感通這五等人雖無父母得事其實與在膝下一般若肯依着這心法行將去何處不遇本生父母耶

新示格言

勸凡塵讀書人心術要端正作事當光明休在暗室欺鬼神細思細想我生平有過無過問功名吾在風

簷掌文衡首論孝弟次品行三論陰騭四論文登名
還是三事備莫謂文章高過人亦有行惡標金榜前
人餘德尙留存更有行善終落寞先人餘孽殃子孫
陰陽報施亦不爽總之爲德者是馨吾今從此來打
破各宜早出迷淪程

叮嚀警戒章

吾一十七世爲士大夫身未嘗虐民酷吏容人之過
憫人之孤克已復禮正心修身忠主孝親敬兄信友
一心如此聽天而行方能久證真位茲當運劫將至

罪罰不遠深爲可哀故特飛鸞降世垂訓諄諄作警
而作戒何其安於常度聽聞藐藐愈溺而愈深且也
深加謗誹妄肆譏評見天尊格言救劫寶章或心非
或口議或聽人擬議或自道已知負罪殊深造惡不
悛有乖昊天好生之德有悖世尊求釋之仁有在天
尊下世之苦有負吾今救劫之心夫禍福無門惟人
自致善惡之報如影隨形仕宦士民課誦詩書嫻習
禮樂見格言而加尊重見寶訓而切箴銘日染耳濡
以堅其信見愛聞慕以導其先使庸夫俗子交相勸

勉共效遵行不至弁髦視之敝跼等之方體予心予
統天地人何神不攝何事不該何物不在何罪不罰
何祈不應何劫不定上則替天行道下能救度萬民
遵吾訓誨富貴功名榮及宗祖背吾典型貧賤死亡
殃累子孫皇天無親惟德是輔吾本無私惟佑善人
吾故復臨凡世叮嚀警戒願諸世人洗心滌慮莫迨
天復加譴各宜改過自新遵守天尊格訓佩服救劫
寶章一毫之惡勸人莫作一毫之善與人方便果能
如此存心自然轉禍爲福若或不生悔悟大劫頻加
不知不覺流浪苦海生而害身滅門死後萬劫受罪
墮入四生六道百千萬劫永無出期可不畏哉凡仕
宦軍民僧道各宜書寫一帙朝夕瞻視觸目警心戒
之在身行之在力

鸞誥函

鱣壇語錄十二則

士人讀書莫先於養氣氣平而心始虛心虛而理始入若夫暴戾自恣是之謂傲天下之理聖賢之言難入傲者之耳雖終身為學徒滋惑耳若君子之量則冲冲然如虛谷之可容君子之懷則蕩蕩然似大海之莫測此所謂和而不同矜而不爭者也可堪笑狹小之夫一事亦足以動其怒一物亦足以勞其神夫至物物而勞之事事而動之欲其氣之常醇心之有主

庸可得乎宜其青者易白强者易弱盛者易衰也爾等於事物云爲惟平其心以觀事和其氣以處物事物之來我應事物事物既去我自還我如此則氣不竭心不勞聖賢之言可入而天下之理得矣

欲因人而生人當遏其欲因心而有欲則當制其心夫天下之可欲者事不一事物不一物雖具欲端誰教爾欲欲之則生不欲則沒生沒何常惟人所欲耳目口鼻具於人何者能無欲香聲臭味呈其形何者不可欲兩欲相投合爲人欲堅不可破牢不可入種

種罪孽皆由欲代代輪迴何非欲然終溺於欲而不返汨於欲而競逐始圖遂一念之貪適一時之歡後必獲萬罪之積受萬劫之難雖然欲之來也難防當知欲之去也貴速來去固屬須臾只要一心勿忽由勉漸至於安自入聖賢之域

理卽天之主天卽理之生天理若二事其實乃相因未付於人時磅礴宇宙內流暢自氤氳既付於人後貫徹心窩裏閑存不可已此中甚危微界限差黍米可憐無知輩途倫與亂理此乃謂違天教化無可啓

卽屬歸教者放言與肆行這也不是理非理卽欺人
知天卽得理是在察識時何者爲天理必要辨得真
不可差些子又在擴充後事事皆天理行之必盡力
不可怠少許辨之旣已真行之又復力久久自然純
不須多着力受之天者全已與天合一天人總一源
只要力諸已

天地鬼神呼吸相通一誠而已如世之謂人不知而
爲者與畏人知而不爲者此羞惡之心也若由此羞
惡之心而推極之自必慎獨謹微爾等須知位天地
贊化育皆從慎獨謹微中做將出來又何慮乎鬼神
不得通靈哉惟各宜勉求無愧幽獨可也

爲人全在於存心君子小人之所以異者其存心不
同耳存於禮義則時時兢惕事事謹慎惟恐或忤於
父兄見責於師友此所以德日修學日進而至於上
達若心存於嗜慾則時時放蕩事事邪僻惟求遠父
兄師友之見聞此所以行愈敗名愈喪而入於下流
到此時雖聖賢亦無奈之何矣善教弟子者惟於幼
年時時加稽察一言一行雖微必懲則外無所引內

有所懼庶幾邪念不侈而可以責之爲善孟子教人求放心亦不過要人常將此心存於理義中耳非寂守此心而謂之存心也

大哉道乎非聖人莫能全其體殫其用子欲全體殫用是以聖人爲可學而至也吾得不爲之訓哉但自古教無躡等爾今初入吾門吾不過取其淺顯易見者言之以爲爾進步之階耳凡於日用之常飲食之際克勤克儉以持家能恭能敬以接物自無浮華欺妄之念擾我天良矣更能持已端方事親愛敬教子

以正處友以忠事上以敬待下以惠言不妄發行不亂舉不道人短不炫己長揚人之善隱人之惡如此之類卽是志道工夫若必窮全體殫用之道則不獨汝不能明之卽吾亦遽難與汝言之也爾當由淺以入深自近以達遠自有能明能得之日惟毋始勤而終怠進銳而退速則可矣

道不遠人人皆具道非渺非冥惟勤可造夫子之道忠恕而已堯舜之道孝弟而已忠恕孝弟豈遠人哉然必由學而入爾等於學雖各少明其理而毫未見

諸躬行吾不知子等之貴於學者何爲乎且也相沿
習成傲慢遇諸言躬行者目作老頭陀辯理欲者指
爲迂學究以致間有一二志士雖欲進修亦無從借
資啓迪矣吾故有此筆錄一法教其掃除妄念一心
靜定但動於心卽書於紙不得參雜毋生疑貳隨心
信筆或示戒守或指功過無不詳明以期實行共入
聖道已耳爾等何不諒吾不得已之心而區區以文
藝見求殊不知文藝一事原非吾筆錄專務亦非吾
垂教本旨吾之垂教因見學者徒事浮文不敦實行

故甘作迂學究而苦苦相爲勸勉雖類老頭陀而不
惜也豈爲爾等艱於誦讀而施此代倩之術以資爾
等之傲惰耶然果能志篤行修而誠明之驗又何事
而不能况於詩文乎若徒以工文而求習吾筆錄是
無志於篤行者其獲罪於吾也甚矣安得冀吾之應
耶今特詳爲申明願爾等勿以日久無報而退志毋
以身事煩雜而怠功必刻刻操存以期日新事事檢
察而求寡悔固其勿正之心泯諸欲速之念業業兢
兢慎幽獨於衾影孳孳急急惜光陰之草露勤而益

勤勉之又勉則道自親而聖域可冀庶不負吾此一番提撕之苦衷也吾言在茲鬼神是鑑勤怠難欺毋仍舊貫

聖賢立訓首貴敦本文藝其末功名富貴則末之聞如歷古來有多少貧賤愚蠢之人全無筆墨並少功名他却能忠能孝能弟能信口無妄誕之言心無奸險之念漫說賢人君子個個讚揚即天地鬼神無不欽敬及死後爲神爲仙成佛成聖者已昭昭在人耳目矣這是未假先生教訓不藉朋友戒懲的何今師

友日益文學日宏如此輩人卒鮮一違興言及此可勝悼哉至若爾等雖具善根而多迷卽有善念而旋失日漸一日將至枯亡並幾希亦見泯沒如何可以不時時警惕刻刻操存誓忠誓孝誓弟誓信專以用恒久功夫靜以思生平過孽久之又久純之又純勉強漸忘自然可望卽不善於詩文全無名位抑何害焉然能如此用功自必一朝心地豁然筆陣風雲龍蛇變化而朵朵蓮花現於筆端矣天必垂憐貧者自富賤者自貴又何名位不可得乎聖訓無虛吾心恒

鑑各宜欽遵以邀天眷詩曰一片婆心盡在茲實爲爾等上天梯能將此語刊傳世功德無邊與我齊士人爲學必以倫紀爲根本次則方言讀書蓋以書中之言皆古聖先賢敦倫之法耳若讀書而不知盡倫則已獲罪於聖賢讀之又何益哉近見世之子弟多以佻達自矜不惟不知敦倫且素無伏案之功動起登科之想吾不知伊所自修者何事而欲延獻者何能興言及此能不哀哉故吾降鸞以爲警覺惟願諸子共諒吾心而各體焉以期有成可也幸無效世

之動云家貧不能養親不能讀書者請試思之貧者不過無美衣食以奉養諸事不能隨時以如親心耳至於語言氣象溫清禮儀豈有貧富之別乎何對妻子而情無不周對父母而時若遺忘可見總無敬親之心反有家貧之譏欺天欺人罪孰甚焉至云家貧不能讀書不思一日之間力作而外豈無安閒時刻總是怠惰文過於貧究之於心能無愧乎如作學生者父母命其從師讀書是其日課一刻偷閒則失父母期望之心卽爲不孝而爲之師範者旣以教讀爲

業自當盡心以訓生徒庶無負於聖賢之傳亦免貽
乎尸素之誚溫故知新豈無所益若謂教學卽無暇
讀書則必併教學亦未盡力矣爾等自今以後各宜
猛省時惕倘仍舊諉過家貧致負師傅有違吾訓慢
親者雷霆震怒怠惰者鬼神降責吾亦不能爲爾等
寬而爾等亦自悔之莫及矣慎之

世上有三種迷人所怕者只是一種有暫迷之人有
久迷之人有執迷之人不患暫迷只患久迷不患久
迷只患執迷何也暫迷之人不見聖人之大道不聞

君子之正言所以無從而悟也久迷之人俗障深固
一言不足以啓其信一事不足以悟其機必定任其
酣夢之性行去直到那行不去處一朝翻然思其所
行之非而後返於正道也執迷之人他別造一識別
據一理無下人虛已之懷無省身克已之功認已之
理爲天下莫過之理視已之身爲天下莫及之身執
而行之雖天命不足畏聖言不足信鬼神不足敬直
到死而後已而終不覺焉今爾等亦不無暫迷久迷
者吾不忍置之而不爲之教但冀爾等聽之遵之勉

之可也爾暫迷者惟多看聖賢言語一一詳細究明
遇事到來無論大小卽細思一番看於其理合乎否
乎若合則又思吾能體乎未能體乎如是思之而事
中之理自出而我從前種種之行盡知其錯矣旣自
知前非又何難獲其後效耶若久迷者也只要將自
已所虛過之四十五年來回想一番我幾閱春秋
何德之不立歟何行之不修歟一思奮然改圖以孜
孜於餘年皇皇於老景勉勵修持猶可爲朝聞道之
君子也至執迷者雖有聖賢爲之師友諒無如之何

矣吾復如何而爲之教哉吾復如何而爲之教哉惟
願爾等毋爲執迷之人則幸矣

天下有不肯爲善之人斷無不能爲善之人有得爲
善而不爲善之人未有欲爲善而不可爲善之人不
然大賢顏子何以言舜何人也予何人也有爲者亦
若是以此思之卽能奮發

竹之名則謂君子豈其有所修持而得之耶亦因其
高節虛衷而歎美之也草木何知有此雅致又梅之
有花發於冬盡以其能耐冰雪而不爭妍於衆卉世

俱稱之爲高士豈不貴甚子等旣欲學道先明物理須知吾欲擅名千古見尊字內必有可尊之實可傳之名名之傳品之尊但求諸已而已若卽物求理因名考實以悟徹立身之道因此而高其節虛其衷耐其寒不爭其豔則無墮落之患矣

廣化語錄

今人與他講到孝弟忠信便說是老生常談這老生常談四字誤了許多聰明之子豪傑之士豈知老生之所談者乃教人爲聖賢爲仙佛之談也豈可以其

常而忽之吾以孝起根至今身登帝位只完全得一孝字亦皆孝之所致也所以處處降鸞不憚言之諄諄莫不以此爲第一件事著有孝經及勸孝諸詩歌諸生已目覩耳聞矣今日降壇復言之者蓋以諸生知而不知行而未行也人這身子是父母生的心中先有一個孝字來這個孝字就是自己活命之根就是自己爲人之本就是自己的元神就是上天與我的至寶就是古今聖賢傳我的要訣人人能盡得這個孝字是於初生來一點元氣保固爲聖賢仙佛參

天兩地皆基於此爾等試思人一能孝心中和順未有不弟不忠不信者孝心出於仁心人未有既仁而無義無禮無智者所以仁統四端孝亦該四德查爾等孝欵大畧功少過多其功則不過尋常具文心迹中各存一點意思說異日吾富貴要如何養親要如何榮親不知顯揚未有日而親已不能待矣豈不在然古人云孝子愛日誠以得一日則孝一日雖三公不肯易也爾等有父母者須竭其力無父母者亦致其思子路爲親負米百里之外是竭力之一端也爾

等縱貧富不一總未到百里負米之境尙自靳其力乎子路親沒之後已身榮顯曰吾曾不若負米時得以養吾親也故孔聖嘉其生能養死能思諸生反要俟榮顯時纔盡孝豈不大謬戾乎且孝之一字所該甚廣古人云事君不忠非孝則事長不順交友不信夫婦不和俱非孝可知矣又云戰陣無勇非孝則凡視聽言動不合於禮俱非孝可知矣吾教人千百年曾無一人體貼此語不得已設筆錄一法蓋曰爾欲爲才子耶爾欲爲顯官耶爾欲爲聖賢耶爾欲爲仙

佛耶此數者任爾爲之但能孝則得不能孝則不得爾等亦可以恍然悟矣

觀心齋語錄三則

予自己未之歲於楚涵三壇贊演叅同妙典宣化南黔考厥由來皆爾劉體恕仔肩之力績云偉矣乃能不替初誠編輯孚佑帝君經籍彙訂成函付諸剞劂其功德力誠莫可量今復以彙集予大洞諸經文籍比例全書同行刊布爲請洵屬篤志向道之人然予總司文教濟人利物自一十七世以迄今茲未嘗少

懈初非語言文字之學亦非清虛寂滅之旨蓋實有取於倫常日用而以忠孝仁慈垂萬世不易之準夫聖王治世首重明經炳蔚兩間煥若日星昭回雲漢卽從古聖賢亦皆實踐躬行語無綺麗大忠至孝全節完倫俎豆春秋芳徽竹帛不假修煉證位佛仙如予衍化源流悉類乎是憫茲末劫儒風頹敗士習澆漓實行罔敦虛文多誕人心世道之憂不僅在墨裏行間已也爾體恕以三世習予儒業兼能奉道真誠根器不凡靈明自異今膺民社之寄當盡忠愛之心

利濟羣生行諸方便果能體予一十七世之慈自可
優入於聖賢之域上不負明王治世祿藉加厚之恩
中不負父母劬勞三世積修之德闡我文宗宣予大
化惟爾任之毋忝成命

惟陰陽分判而有男女之別闔闢翕受而定乾坤之
功秉彝攸好同賦氣以成形倫紀肇端首化源於匹
配天地既無孤行之道人物寧有獨生之機是以羲
文演卦妙六字之玄微周室開基丕二南之雅化聖
教固不遺閭閻真修端有藉坤元迺降本而末亦分

流遂假邪而正益僞飾貞潔之心漸淪松栢之操僅
見大義猶迷玄功奚識雖三教示覺世之言然千古
少專家之論提撕警惕實予之慈宣布敷揚維子之
任據奏請演女經丹旨情辭肫切同此救劫婆裟原
委周詳本於誠求赤隱開婦道之津梁數已符契啓
女蒙之性學時可敷施當卽轉咨旋經會議侍書種
妙緣於前世假斯警化凡流左司植仙骨於夙生賴
以闡揚大化任茲鉅典贊我天工勅元君擇吉以談
經命羣真隨時以行化言取誠實醒天下闔闔之迷

文必精純垂後世母儀之則果二十四章之美備自百千萬劫以超昇特勅行知欽承勿忽

昨據桂宮諸真會奏筆錄一案天下奏懇習鍊者不下萬餘數雖其傳度各有宗乘然皆疏章上瀆乞賜靈通符使紛紛不遑接應其間誠偽難以攸分更兼始終莫可遽信恐滋紊亂致敗士風有失立教本旨請予勅下諸司釐定律法以重大道等情申奏前來予以天秩崇隆位司文運不惟士子貴賤隸吾職掌卽朝廷黜陟人世榮枯莫不係吾衡定筆錄之設原

非開俗子窺竊覬覦之端特以助寒窓苦讀之輩尤須擇忠信孝友之人始得授此換胎易骨之術非泛常遊戲之筆墨也曩以宣布文化用廣師傅江左習尙最稱繁盛天下相因所在皆有飛章瀆奏靡有寧息其間類多食腴被繡之子冀假此以博科名兼之輕薄佻達之徒欲捷道以求文譽詐疑雜間終始二心名爲鍊筆念勝穿窬風俗人心於此一壞所謂士習存者鮮矣此法予昔專勅吾門校錄教主大闡妙化陳真人糾司其籍凡有疏奏皆由伊彙報彼不誠

不敬之人雖有奏疏亦僅及彼而止不達予前一向因佑啓人文未加清釐今據諸真所奏誠有關士風不淺特勅桂宮文曹神將帶令吏兵遍巡天下查視筆錄授受等人姓名並察其誠僞疑信之心爲人立品之事分晰彙奏以候考核明示賞罰果有立心制行根本無虧雪案芸窓奮勵上進者列爲優等不惟賜以慧光兼可錫之祿秩次則省身知過改絃易轍濯磨自新苦志善道者列爲次等視其悔心果誠察其後來無二亦準錫之善慶量其所行之事陰隲大

小而予以報其有從前所云不肖等輩察其過惡所犯輕重勅以文魔惡煞使之喪志亂神俾顛倒其性靈以受冥罰更置文錄糾察司真將各一專職其事嗣後度師傳授筆錄俱着由校錄陳真人轉奏不得擅行上瀆如違吾命凡桂宮諸功曹俱不許傳遞其年未及冠以及素未通文之子一概不許傳授如有度師私違此旨傳授幼年無知及匪類等人一經糾察真將察奏斷不輕赦爾符圖司教金本存恪遵此旨謹凜奉行毋輕忽干咎予自諭知滇蜀諸壇一體

遵奉可也

玉詮語錄四則

修道之要惟存一敬字在心真字在性清字在躬和字在氣即便日新其德日進於道人但知敬字之用在於對越之時而忽於幽獨之際所以內念不純漸肆回僻果能常存敬心則放心日收惡業自伏天賦我形即付我性本無不真既成我性即成我命凡境界之或順或逆俱從真理中化現真命中安排不因用偽而或移不因存真而加劇故人之捨却天真好

存人偽者俱未了本性者也至於清之一字尤當研究即如坐忘則天君泰然用慧則夢魂顛倒可以知心本好清趺坐則血脈流通奔馳則氣機騰沸可以知形本好清蔬水則齒頰流香酒肉則胃膈填穢可以知臟腑亦本好清居貧則布絮安然競爭則高車慮覆可以知一切事境亦本好清洵乎清靜經所云夫人神好清者是也庸士未研斯理故生倒識豈知清濁一分靜躁迥別清而靜者生之徒也濁而躁者死之徒也可不慎乎然而致清之秘妙在一和和者

無過不及敬而能和則免於矜峻之患而開其自然之光真而能和則免於滯著之害而生其大明之輝清而能和則免於寂槁之容而養其純潔之體一和之用通貫三德譬之太極之中渾含至元三氣做此工夫不零不碎返躬俱全方得修道之要願爾等致思焉

韓耀宗問性命之旨曰空將性命苦尋思若個行藏得所宜回也屢空斯善受參乎一惟是能持半窓明月窺無盡一榻清風樂有餘試問向平推順逾何如

守得性如如

天教至廣性命之理闡發無遺只要吾子靜將真訓細參便可一源洞達若言命則兼氣性則專理何以易書六十四卦全是氣機發現而物之正性卽具於中可見性亦兼氣又云性有氣質之性有義理之性分爲二者亦非也難道義理之性遂空空洞洞離了氣質而虛懸者乎後之儒者未通玄妙所以出此不了不當之說若本壇真訓性命合一此玉光之教旨也至星家所言之命是主後天氣數而言更屬一曲

之學明道者所不語又問立命之旨日子與氏所言立命者不過如太上所云全受全歸耳非袁學海所云積功求福之意所以端木貨殖孔子便以爲不受命蓋於人事中增了一分卽於天性上虧了一分是故不獨立命兩字廣大難知卽受命兩字亦精微不可易見人能解得受命之旨則無往而非道矣

兩間粹氣命爲人四德同時集此身若使一毫私欲蔽誕衷先盡與禽倫所以學道之人不須於命上做手脚只要保全了天予之性卽已契合乎命故謂之受命可也謂之立命可也卽謂之造命可也復命可也總是聖真學問無二無雜不著推求不俟談論在乎默而識之不言而信方爲得旨子其誌之

天源函

三教歸一論

天地得道之體聖賢得道之用道以陰陽五行化生
 天地萬物人以陰陽五行造作日用倫常天地無為
 而人為之人能以天地之無為為之則三才奠而八
 荒寧矣吾觀大有國中三教分爭九宗橫逾失其本
 來之性善但求末務之便宜根本不明枝葉莫辨崇
 釋氏者但言幾卷彌陀消卻一生罪障學聖賢者徒
 以飲食富貴可以奉君親即尋真之士只以燒丹煉

藥認作玄宗之路是皆不知根本妄求枝葉者也更
有學得一棒一喝便去疑鬼疑神不識來時面目博
得腰金衣紫不思治國齊家一味堆金積玉穿著黃
冠草屨竟去訪道尋真拋了高堂父母此等愚癡難
以悉舉甚有圓頂方袍六根未除做出許多淫殺盜
映雪囊螢至善不講博得一味貪嗔癡尋鉛覓汞坎
離不明惹得一心愛惡慾如此衆生何日出頭至於
輪迴孽種莫可言狀可憐三教聖人說法要不得一
箇歸天衆鬼卒攫拏時刻有萬千入地皆因先覺真

言置若罔聞魯論曰人能弘道非道弘人金剛經云
有能受持四句偈等廣爲人說其福勝彼清淨經曰
雖名得道實無所得爲化衆生名爲得道信斯言也
千聖相傳總歸於一只在日用尋常之內舍之更無
道矣予爲南宮帝主掌一切文苑福祿之籍卽以文
昌設教化度衆生無分三教莫論賢愚道在是人予
卽眷命於是人要曉得所謂道之根本卽是孝弟二
字能勉之者須當戒慎

一凡上智之士自然純良至於不敬天地敗壞倫常

雖非人心亦具人形果能方寸不朽自然教化所及
 只要修行二字認得明白鼓舞作新亦能有成所謂
 修行者修其往日所行也或不孝於親則當修其行
 以事親或不忠於君則當修其行以事君至於貪婪
 狂妄奸盜邪淫皆反其從前所非為而修之豈世所
 謂好善樂施修齋念佛之謂哉非不欲人好善樂施
 等事但恐人止以此
 為修行是遺本
 而務末矣故云

一凡天性敏慧者不可自恃本來愚鈍者不可自棄
 孔子之道傳於樸魯之曾子釋氏之道傳於粗蠢之

達摩惜乎孟子盡心養氣之後不能復繼至後儒只
 講得理學文章六祖米熟未篩之後斬斷其宗至愚
 僧只曉得玩空說法我今直以性命教人先在家庭
 做起所謂人事盡而天理見自恃不可自棄不可乃
 是中庸學問

一凡作事驟然有成不可驚喜久而無成不可厭倦
 驚喜之心即是厭倦之心懷此心者非大用之器也
 吾今比作先覺若能後覺亦相去不遠只爭先後間
 耳何有霄壤之隔也只要不厭不倦無欲速無矜持

必能成其大器

一凡作事無分彼此莫論人我隨地是道隨處可以見道所謂道在邇而求諸遠反身而誠樂莫大焉果能皆反求諸己則人物彼此之見自然化矣

一凡作事當求其可必者不當求其不可必者不可必者富與貴也可必者道與德也富貴在人苟欲求之不亦難乎道德在己苟欲取之不亦易乎舍易而圖難知者弗爲也吾爲世人說破此卽是修其天爵而人爵從之之說旣得人爵而棄其天爵尙然不可

况天爵之不覩不聞而欲求人爵焉可得乎

一孝弟最難凡我弟子要曉得生身之德恩如天地孩提之時撫我育我未寒則思我衣未饑則思我食果能以父母愛我之心還事父母加他一倍至誠方可云事親之道未有能事親之人而不悌弟敬長者也

一忠信不易凡我弟子要曉得君臣之義如同日月一味正大光明得志與民由之能致君於堯舜爲神忠身殉社稷爲真忠逾鱗犯顏爲奇忠明知不可故

意果敢爲名忠不惜一死爲愚忠夫忠以信而行信以忠而辨非但有官守言職者當審行之卽兆民士庶亦宜守其忠信自然有爲

一仁義匪輕凡我弟子能行忠孝兩端卽是爲人之本又當濟以仁義方能卓然見解有經權常變之分治亂安危之用所謂惟仁人能愛人能惡人未有仁而遺其親者也未有義而後其君者也果能以仁義行忠孝方爲全人

一道德至重凡我弟子旣知根本道理不離忠孝兩件當兼之以德養其體以全其用所謂德者何能行之如未行能及之如弗及也終日拳拳常有不自足之心則德日休而道日弘自然登峰造極天人仰望不待予之南宮符命三界鬼神無不敬畏久之神遊玉京不求而自至者也

以上數章爲上乘弟子說法久而行之乃是聖人賢人卽是真人神人上品天仙往來默佑百神呵護天地式從掌陰陽之柄竊造化之權故曰人皆可以爲堯舜不在文章何假化筆南宮之位虛其左矣如或

未能當守我戒

一曰事親戒忤違非所論於大端也卽一言一動必當曲意承歡每欲見親有喜容不可使親有怒色或不能竭力亦當自知有愧我亦不多責也

一曰事君戒奸僞非所論於反背也卽一事一行不敢以己之私蔽人之公當思愛民如子當其言安其職或不能致身亦當自知有愧我亦不多責也

一曰尊師戒褻慢有一字一言師終身師文字師道德師師之義大矣一生品行賴師而成所以與天地

君親並重今世衰道微但以書云子曰認作爲師之道在此竟將千聖真傳置之勿問此等爲師之人自先取其褻慢以致日流於下師不成師弟不成弟莫可言狀予非玄宗得道焉能職掌南宮要知三教只貴真傳千聖總是一理或一字格我之病或一言使我遷善則終身戴之不忘至於性命由之而得道理由之而明則當尊而敬之如同天地父母豈可褻慢哉

一曰重友戒褻狎宜擇人而交勿因小過而遺棄勿

因言語而爭競慎始慎終以取其長輔我之短
一曰敬長戒驕矜或年齒之長或文字之長或閱歷
之長或道德之長所長不同能敬而畏之自然取益
若一味驕矜人其舍我有何畏哉

一曰愛下戒酷虐凡一切下賤僕隸俱作兒女看待
自然感我恩德當思報我卽不貪其報亦不失我天
地好生之心我之品行成矣

一曰交接戒怠惰我有事於人則當求之何用我惰
人有事於我又當應之亦無用我惰所謂君子戒慎
恐懼之心乃於交接處見之

以上數章乃爲中乘人說法信能行此數者我當卽
命南宮文仙降其左右開其茅塞使之抵於有成爲
命世之材闡千聖之奧日後位證南宮所當寶之重
之

桂宮誌卷之六目錄

天心編

海恩函

蕉窓十則

慾海廻狂寶訓

戒淫寶訓

聖願十戒

十戒

十戒十宜

示黃正元訓十八則

天戒錄

玉定金科特宥示訓十一則

戒溺女寶訓

示諸士訓

同慈函

高上玉皇本行集經前序

玉皇本行集經序

玉皇本行集經後序

高上玉皇本行集經序

太上道德經解序

大洞玉經序

大洞經序

九皇新經註序

呂祖同參經序

新增本行集經朝天寶懺條規序

太上朝天謝罪大懺序

玉局心懺序

太上感應篇序三則

濟世寶筏序

遷善寶筏序

勸懲輯要序

功過格序

陰騭文圖說序

慾海慈航序

開化末劫序

夢醒錄序

玉定金科例誅輯要序

玉定金科特宥輯要序

玉定金科例賞輯要序

降乩原委序

不忘函

紫府飛霞洞記

護經函

玉皇本行集經跋

觀物函

敬齋銘

心箴

珍愛函

南宮符命

修心養性篇

定心篇

桂宮誌卷之六天心編

安南徐 珽彙輯

鷄林李培根校訂

海恩函

蕉窓十則

自序

感應一篇只三代而下之君子功過兩條乃
三代而上之小人盖人根行愈薄動輒多愆
聖賢不得已而作此書猶佛老遇下根人說

因果也然世不古處求其見性明心嗜仁慕義者指不多屈有能信行卽屬殊妙但塵見未明肉眼多垢往往以望報心搖惑善念曰某也或以善而得貧賤某也或以惡而得富貴噫可甚嘆哉善者得貧賤焉知不富貴於萬年惡者得富貴焉知不貧賤於千古且善者之先其孽或不獨貧賤其僅以貧賤也未必不因善故惡者之先其福或不獨富貴其僅以富貴也未必不因惡故甚至富貴滿門

誅戮婦子多污貧賤一室安諧彝倫無愧古云富貴未必是福貧賤未必是禍良有以也惟聖賢菩薩眼有智珠胃藏明鏡見得真識得透自不以此動心何物愚夫妄卽拊心頓地搔首呼天自謂小兒造物神鬼無知噫可勝嘆哉故欲爲此者必須開一幅大面孔辦兩隻大手脚眼要高腹要廣有好生之心而不作泥土佛守髮膚之愛而不做怕死鬼何妨殺殺一人以安千萬人何妨死死一身以

顯千萬世必求忠必求孝不可身美其名而君父得不美之名也辨是也辨非不可身去其謗而天下有不自之謗聖人不可毀有時鄙夷惠而不道大人不可褻有時薄君相而不爲打破愁城跳出苦海方是大人明心了性功夫自不同腐儒計功責效小見也諸子事吾有年吾示諸子無數乃落盡天花頭不一點豈以吾爲戲直以自已功名性命作戲耳至香前相謁首未頓地爲士者先問名爲

商者先問利是猶却步而前人不可得也今有蕉牕十則用以共勵必有一誠實心恒久心由勉而入安自下而達上不用希功但求寡過不須祈福但求免災以是而造於功過盡泯仍歸太上之天固爲吾敬卽不然望感應有靈自畏災殃之集亦受吾憐勿仍蹈舊時之轍但同聞霹靂之聲勉之望之

一戒淫行

未見不可思當見不可亂既見不可憶

處女寡婦尤宜慎之

二戒意惡

勿藏險心勿動妄念勿記仇不釋勿見利而謀勿

見才而嫉 貌慈心狠者尤宜慎

三戒口過

勿談閨閻勿訐陰私勿揚人短勿設雌黃勿造歌

謠勿毀聖賢 尊親死亡者尤宜慎

四戒曠功

勿早眠遲起勿舍己耘人勿為財勢奔馳勿學為

無益勿見異思遷 身在心馳者尤宜慎

五戒廢字

並戒惜字於未有字之前凡有關人身家性命婚姻閨閻下筆者此字當戒

勿以舊書裹物糊牆勿以廢文包茶拭桌勿塗抹

好書勿濫寫門壁勿嚼詩稿勿擲文尾 於途間穢中尤宜慎

六敦人倫

父子主恩 尤當喻之以義 君臣主敬 尤當引之以道 兄弟相愛 尤當勉之

朋友有信 尤當勤以有成 夫婦相和 尤當敬而有別

七淨心地

玩古訓以懲心坐靜室以收心寡酒色以清心卻

私慾以養心 尤當悟正理以明心

八立人品

敏事慎言志高身下膽大心小救今從古棄邪歸

正思君子之九思畏聖人之三畏尤當不惑浮言

九慎交遊

終始不急內外如一貴賤不二死生不易功過相

規棄夷惠而師仲尼絕奸狂而交中正尤當立身為萬世友

十廣教化

遇上等人說性理遇下等人說因果多刻善書多

講善行尤當攻邪崇正以衛吾道

慾海迴狂寶訓

孽海茫茫首惡無非色慾塵寰擾擾易犯惟有邪淫
拔山盖世之英雄坐此亾身喪國繡口錦心之秀士
因茲敗節隳名始為一念之差遂致畢生莫贖何乃
淫風日熾天理淪亡以當悲當憾之行反為得計而
衆怒衆賤之事恬不知羞刊淫詞談麗色目注道左
嬌姿腸斷簾中窈窕或貞節或淑德可敬可嘉乃計
誘而使無完行若婢子若僕妾宜憐宜憫竟勢逼而
玷乃終身既令親族含羞尤使子孫蒙垢嗟嗟總因

心昏氣濁賢遠佞親豈知天地難容神人震怒或妻
女酬償或子孫受報絕嗣之墳無非好色狂徒妓女
之祖盡是貪花浪子當富則玉樓削籍應貴則金榜
除名笞杖流徒大辟生遭五等之誅地獄餓鬼畜生
沒受三途之苦從前恩愛至此成空昔日風流於今
安在與其後悔以無從胡不早思而勿犯謹勸青年
烈士黃卷名流發覺悟之心破色魔之障芙蓉白面
不過帶肉骷髏美艷紅妝乃是殺人利刀縱對如花
如玉之貌常存若姊若妹之心未犯者宜防失足會

行者務早回頭更祈展轉流通迭相化導必使在在
齊歸覺路人人共出迷津則大惡既除衆邪自消靈
臺無滯世榮垂遠矣

戒淫寶訓

帝君曰甚矣淫之爲害大而流禍毒也燕啄皇孫漢
祚因之將盡龍殽帝后夏廷由是寢衰新臺作而穢
迹彰墻茨歌而醜聲著琴挑臨邛卓女空遺萬世譏
評詩寄蕭寺崔鶯徒作千秋笑柄貪歡致疾瘦減苟
令之肌漁色殞身憔悴潘郎之鬢夢遶翠帷錦帳拋

却黃卷青燈情牽螻首蛾眉棄彼螢窓雪案赴佳期
於邃室暗中獨往宛然穿窬之形踐密約於空房茲
所雙擒旋作餐刀之鬼冥則有鬼神之殛明則有王
法之誅或徒流或笞杖或絞斬剝膚傷肢受盡許多
現報或劍樹或刀山或油鼎悽風慘月難免無恨陰
刑昔之臥柳眠花歡娛有幾今此呼疾叫痛解脫何
時豈知流水桃花腸斷情多劉阮終成苦趣行雲送
雨魂迷夢裏襄王總屬愁因害及當身纍言莫盡禍
貽後代罄紙難書女爲娼而媳爲妓倚門獻笑風流

債加倍填還子則絕而孫則滅荒塚孤眠姦淫報異
常酷烈夫富貴之輩身享厚實崇高都緣累劫修來
戀此片時之樂盡墮前功貧賤之人日受憂愁困悴
皆是前生造就圖茲頃刻之歡愈增後罰少壯者前
程甚遠因好色而不齒士林身敗名滅遲暮者光景
無多爲貪淫而遄歸死路骨化形消何如苦海回頭
奚若愛河登岸視明眸皓齒不啻骷髏視炫服新粧
一如鴆毒畏鬼神之殛對彼姝而不動邪心懼王法
之誅處暗室而不興慾念品行無慚於玉潔姓名自

著於金函是則予之所厚望而重期者矣

聖願十戒

帝君曰一願世人崇品行勿爲浮薄欺君親一願世人警報應勿謂天高莫聽聞一願世人澹情欲勿以美色起淫心一願世人輕貨利勿以貪污敗令名一願世人絕趨競勿以干求媚要津一願世人須忠厚勿以睚眦逞鬪爭科名不在文章取願洗凡根見聖心

一戒不忠不孝不仁不義當効力君親推誠萬物二

戒不得陰賊殘謀害物利已當行陰德廣濟羣生三戒不得殺害衆生以充滋味當行慈惠以及昆蟲四戒不得淫邪敗正穢慢神明堅守貞操使無觸犯五戒不得敗人成功離人骨肉能以道助物令九族雍和六戒不得譏毀賢良露才揚已當稱人之美善不自伐其功能七戒飲酒過差食肉違禁當調和氣性以輔清虛八戒不得貪求無厭積財不散當行節儉專恤貧窮九戒不得交友匪類居處雜穢當務勝己日進高明十戒不得輕忽言笑舉動非真當持重寡

詞以道德為務

十戒

一戒不孝二戒不弟三戒不忠四戒不信五戒不敬
六戒不慈七戒不廉八戒不節九戒不敬惜字紙十
戒不檢束威儀

十戒十宜

一戒嫖姦女色 二戒忤親逆師
三戒食牛犬肉 四戒肆口譏評
五戒貪謀苛刻 六戒意妄心欺

七戒厭女淹溺

八戒擲骰鬪牌

九戒污穢文字

十戒褻瀆神明

一宜重敦人倫

二宜維厚風俗

三宜力盡職業

四宜便積陰功

五宜廣施教化

六宜慎擇交游

七宜和解爭訟

八宜通無濟急

九宜和鄰睦族

十宜持顛扶危

示黃正元訓

正元遵奉帝君朝夕頂禮飲食必祝自總角

以至服官數十餘年未嘗一日稍懈積此微誠遂蒙帝鑑雍正辛亥歲降鸞於洋河公署逐事指示不啻嚴師慈父數載所記幾成卷帙今之所錄特存十一於千百爾敬錄帝訓於左

世之誦吾陰隲文者甚多而能身體力行者絕少惟吳郡彭子定求頗知道理予故屢降其家丁寧開示不但福其身兼福其子孫以爲世之信心者勸今爾黃子正元奉吾日久造次顛沛未嘗廢禮予故以昔

日之告彭子者再爲子告焉夫爲臣之道但當盡其職之所應爲君果見知而我之所以盡職者自若不得恃寵而驕也卽君不見知而我之所以盡職者亦自若不得熱中而怨也如是而後謂之純臣官不論文武皆有父母兵民之責不貴乎喜事而貴乎省事蓋多一事則地方受一事之累而省一事則地方享無事之福子居心清淨不肯妄爲而屬員兵目未必盡體子心所當加意訪察務令兵民和睦如手足之相聯則澤及地方矣七情之中惟怒爲易起亦惟怒

爲難制子性多急怒氣傷肝殊昧保身之道惟時時
涵養事事忍耐則血氣歸於和平而身安體健矣營
伍廢弛已久子加意作新極力整頓意誠善也但緩
則易從急則難受且人有智愚智者不教而能愚者
教亦不能子於能者獎勵之選拔之不能者憐憫之
哀矜之母驟加責罰也子近年來吾命巡司監察據
報稱子存心動念頗無過失可喜可喜若再力行前
項則足感上帝於九天獲福自無量矣贈子二聯當
書辦事之所觸目警心可也

念念勿忘君親盡厥職殫厥心方克對衾影而無愧
時時加意士卒撫以仁勗以禮庶如運臂指而有功
職任河漕欲兩事無忝道在勤敏清慎權統士卒冀
千人盡服端由教育撫綏

今夕之談已畢嗣後有未決之事吾仍當親臨指示
方纔所囑勿視爲老生常言而忽之也吾弟子之中
已成就彭子定求矣子卽今日之定求也其敬聽予

言毋忽

居官
之訓

功名有命速不足喜遲亦不必憂但居其位則思謀

其政為國家辦事如營自己私事一般真心實意無幾微怠惰推諉於其間如此則君豈有不見知之理盤根錯節方別利器勉之勉之辦事之訓

立功宜勇勇則不惰改過宜猛猛則必除勿朝是而夕非勿始勤而終怠勿自以為功而不知其非功勿自以為無過而不知其實過明以察機健以致決則去道不遠矣行功過格訓

子奉吾陰隲文甚虔但宣聖有言法語之言改之為貴異與之言繹之為貴子居官者也修德行仁較平

民更易譬若順風而呼聲非加疾其勢便也陰隲文

中法戒昭然其速改之繹之奉陰隲文訓

為人處世要貴恒久勿以小不如意而生退悔心勿以稍稍遂意而生滿足心用法當寬處即寬遇事當厚處即厚除害不如興利剔弊不如濟人目前做得一事後福即多得一日因果報應捷於影響不可不知也恒久之訓

近見爾痛改前非刻刻以存天理遏人欲為主此誠求仁之方但求仁莫大於恕恕者推己及物之謂若

以已所不欲者施之於人已則快矣人將不堪再於此字日加涵養則天理復人欲淨而仁道得矣強恕之訓

邇來用功雖漸近自然但人之檢身須如老吏斷獄推勘到底若不逐事省察是以高明自居此心一放不可復制矣功過一冊雖是下學工夫却是入聖關頭若廢而不書予於歲終憑何考核仍照前行之勿

自畫可也

行功過格再訓

立政如權石居官若水然疑多常致怨怒盛每招愆御下寬嚴並交游道義兼戲詞休出口美處莫情牽

刻刻存忠孝時時法聖賢惟將心地正莫把念頭偏

從此遵吾訓祥臻福自繇

為人

爾舊運已除新禧將及然福不遽臻必修德以迓之自今以往爾其始終成一好人無負予數十年期望之心也蓋爾之質甚良譬如璞玉不加彫琢終不成器過為身心之累一有差錯便如美玉受玷若不極力洗刷則瑜為瑕掩而美者不美矣子近來記功錄過總是逐事操存未免煩苦不見有為善之樂吾今示汝以提綱挈領之法依此做去則大段無錯而細

目自張矣一在修身修身之道先戒口過叱咤之聲
不妄加於僕役鄙褻之語不忍施於婦人怒於甲者
不遷於乙錯於前者勿蹈於後具平等之心存寬大
之量古有焚鬚而不易兵潑羹而不責婢者其雅度
可法也一在齊家長舌之婦毋許近側嫌疑之介辨
之宜明非惟嚴口舌之防且可致和氣之集此二者
雖屬常談却是爾近來切要之務其敬遵予言修德之訓
爾近來時時要做好人但做好人須要做徹如爾前
世有重武之心故今生得獲武報今既欲歸我泮林

仍須修積文因方獲文果一修文廟二重經典三惜
字紙四敬師儒五開義塾六變氣質之數者能行即
行倘力有未能或勸勉文員或募化巨室婉轉成就
非獨本身可躋東班且子孫永繼書香矣文學之訓
爾力行諸善可謂十分勇往十分篤信但古人有言
為善如行路須要足力繼若廢於半途到底終無濟
爾其視爾之財量爾之力勿信間阻之言勿執已足
之見勿虎頭而蛇尾勿昨是而今非見一善事聞一
善言如渴者遇漿不盡不止饑者得食不飽不休由

難而易從勉而安使念念皆善事事皆善則聖賢可
希豈止福及本身慶流奕禩已耶行善之訓

爾濟人利物之念時時流露懲忿窒慾之思刻刻防
閑雖有小過難掩大功斯為可喜但先民有言為善
務滋去惡務盡何不索性做一好人皆務決去也細
行不矜終累大德尙其勉之絕惡之訓

今日頂禮者甚多莫不尊我敬我然尊我敬我之相
不如尊我敬我之言尊我敬我之言而不克見諸行
事與不尊不敬者何異前囑爾六事已次第力行可

謂有志之士可謂信心之人但王道無近功爾但存
爾善心爾但滿爾善願不必求速效也乙卯功過格
司中折算僅得功二百餘條者以爾平日無心之口
過未盡登記故也口過最傷忠厚上干天怒已向王
用予言之茲不復贅聖誕日訓

適觀爾子光錡可云美玉但須雕之琢之使之成器
雕琢之功在乎蒙養何謂蒙養見正人聞正論行正
事出正言勿因其能跳動而以為有精神勿因其善
言語而以為有聰明刻刻提撕時時教訓方不負命

名之義愛而勿勞不如不愛宣聖之言不可不思也

教子之訓

爲善若登山日進日上爲惡如流水愈趨愈下彼至愚之人非不知善之當爲與惡之當去也乃往往舍天堂而勿居入地獄而不悔者一則由於心之多所疑一則由於愛之難於割心多疑雖天堂在望每徘徊而不進愛難割雖地獄當前亦隱忍而相就總之由於見理之不明所以古來忠臣孝子義夫節婦不過於義利關頭看得真切故爲善力而去惡勇也今

爾時時要行好事要戒不好事殊屬有志但須實實落落勤勤懇懇遇好事卽行不必求人之感與不感力之繼與不繼見不好事卽戒不必諉之於異日姑待於他年除易起之疑去難割之愛則違道不遠矣

辨明義利之訓

今係上元日元者善也故上帝命三官於此日錫福消災人旣秉陰秉陽負形負氣必須以上帝之心爲心始不愧爲人上帝之心何心乎慈悲之心也廣大之心也萬物一體之心也子曰言慈悲而接物每多

任意日言廣大而細過恒不能容日言萬物一體而成見未化不無界限畛域之分誓願改過踰時復犯是未改也立意平曠觸處動火是未平也子才情英發然才而不自以為才方是大才子辦事能幹然能而不自以為能方是真能嗣後須養其氣寬其量宏其度化其偏長庚在歲自獲意外之喜勉之勉之變化

氣質之訓

吾之陰隲文非止求福之根基實乃作聖之階級若徒口誦不如力行而獨行之又不若與人共行之欲

與人共行惟廣布流傳無智愚賢否觸目警心胥歸於善贊化育而參天地功莫大焉此爾今日之願所以深足取也刻陰隲文註解訓

吾之陰隲文世之刊者頗不乏人但施者僅供求福受者惟供糊壁不但無功且致褻瀆爾今訂為書冊加以圖形使担夫牧豎一見了然其救世之心甚苦吾所深喜吾所深取刻圖又訓

天戒錄

帝君曰吾奉金闕至尊之命於每月寅卯日按行艷

都地獄考定天下有罪人民事實見夫黑籍如山皆是世人一生孽案諸惡之中惟淫爲首姦人妻女玷人閨門在地獄中受苦五百劫方得脫生爲騾爲馬又五百劫乃復人身爲娼爲優設謀造計姦宿寡婦尼僧在地獄中受苦八百劫方得脫生爲羊爲豕供人宰殺又八百劫乃復人身爲瞽爲啞爲五官四肢不全之人以卑亂尊以長亂幼敗壞綱常在地獄中受苦一千五百劫方得脫生爲蛇爲鼠又一千五百劫方得人身或在母胎中死或在孩抱中亡畢竟不

享大年更有造作淫書壞人心術死入無間地獄直至其書滅盡因其書而作惡者罪報滿後方得脫生鬼國幽幽冥冥不見三光餐風臥水皮膚慘裂雖遇仙佛不能救度淫書之爲害世人不知其禍甚大本以名閨淑媛識字知文或綠窓晝靜或青燈夜闌展卷視之魂飛魄蕩不禁慾火之焚遽成奔竊之行致節婦失節貞女喪貞或有聰明子弟秀而有文一見此書心迷意亂或手淫而不制或鑽穴而踰墻小則斷喪元陽少年夭折大則瀆亂倫紀不齒士林若夫

巧作傳奇當場演出教習雙童亂人清操其罪尤重奈何士子以夙世之慧根握七寸之管不思有功於世積福於身徒造無窮之孽深可悲也

玉定金科特宥不孝示訓

帝德好生憫凡愚入劫之苦聖恩寬恕垂原情特宥之仁凡爾士民官宦各宜仰體天心倘藐然而放遊法外雖有原情之赦終無抵折之功是亦欲寬而莫可如何施恩而無從被及罰及而悔遲焉矣爲此揭示一體省之

特宥不悌示訓

皇矣上帝臨下有赫監觀四方求民之莫陰隲下民誕敷文德顯命不易會其有極虧盈益謙不僭不忒惟天命吉凶在人惟天降災祥在德德之休明則誘其衷而去其疾德之昏亂則奪之鑑而喪其明凡今之人小子躑躑民之無良職涼善背民之回適覆背善戾皇天震怒降此鞠凶昊天不惠降此大厲天之方難無然憲憲天之方蹶無然泄泄我卽爾謀聽我囂囂我言爲服勿以爲笑天之方虐無然謔謔爾用

憂謔不可救藥敬天之怒無敢戲豫敬天之渝無敢馳驅彝倫攸敘黽勉求之因心則友則友其兄如保赤子心誠求之有孝有德天保定爾徧爲爾德上帝臨汝神之吊矣貽爾多福爾壽命長矣第祿爾康矣純嘏爾常矣于胥樂兮于胥樂兮

特宥不忠示訓

天地以無私示象日月以無私輝光聖賢以無私闡道神仙以無私化民其所以教人之忠詔人以誠固無所不至而蔑以加矣何乃誨者諄諄聽者藐藐喪

厥有生之初性入乎後啓之詐虞背理逆天毀心易性而自絕乎天眷以反速其冥誅據此冥頑不化理該按例而糾殊上帝好生惟刑之恤我皇多命宥罪惟寬於已溺已沈之際猶深提拔之恩在必誅必討之時又肆原情之赦噫嘻天之愛人有加無已人之奉天當更何如所願順天休命戢除詐僞之念欽若昊天復見天地之心則庶不負帝天化育之仁而且獲福無涯矣人其勉之予日望之

特宥不信示訓

明德慎罰上帝之俯眷恩深宥罪惟寬下民之仰瞻常切第僻以止僻金科赫著於寰瀛刑期無刑帝謂早深於在宥是以赦例孔頒更垂洋洋之謨訓緩贖備列轉深善善之章程雖然帝恩有耀大信炫著於人間而皇天無親誠信宜敦於下士復其見天地之心何妨七日泰然剖肝胆之垢勿諉三年蓋憂悔吝者存乎介天常昭益謙之象震无咎者存乎悔人須知剝復之占先儒蔡云彌天大罪難當一個改字倒地塵污只怕一個悔字此深明天人相與之理之言讀是科者試卽此而思之

特宥不禮示訓

人生有順逾處世有難易惟在禮不禮之間也順禮而行則順而易悖禮而行則逾而難上帝曉揭金科無非欲人處順而易也更垂特宥無非欲人去逾與難也嗚呼上帝臨女靡有底止人之生也盍亦思之使任其染溺絕不自新雖好生無盡之天有難逾理相宥者卽不得不執法相誅矣人乎人乎胡不順禮行之

特宥不義示訓

上帝議法不得已也下民改過豈難之哉願宥罪惟寬特開自新之路惟刑之恤實策崇德之修天之生此民也誠無所不至矣人之奉於天也豈絕不介意哉夫義者天與之良心人生之固有擴而充之可大可小放而準之宜已宜人縱爲物蔽氣拘何難克明復始則改過以順天庥作新而崇實德亦正得之垂拱而斷無有掣肘也願諸官民人等體上帝好生之德復一誠無僞之忠勿謂罪已犯而隨流須知過能

悔而近道縱法言而勿憚改死從前虛詐之心悅巽申而振作新生此日真實之性庶幾天心復以人心而合天心天將益汝人道誠以人道而參天道人順承天則何畏乎罪積何畏乎劫臨何憂乎災之不滅何患乎福之不生也哉

特宥不廉示訓

世人爲善不成皆爲名纏勒住世人站脚不穩皆爲利鎖束住解得名纏開則無善行不去開得利鎖發則無惡擺不脫然則廉之一字實天與人以爲善去

惡之良藥妙劑也何世人夢夢不醒而迷於貪婪閣
住一生受用而且以自賈其禍也耶雖然東隅已逝
桑榆可收逐羊已忘補牢非晚則雖貪妄之罪已及
而轉關邀福其功猶反掌也况上帝寬容特開宥例
罪雖貫盈猶准折贖苟從此而猛着一鞭豈惟免罪
其獲福當未有艾也吾願世人趁此機關時加策勵
省惕乎積金不如解書積書不如積德之言惶恐乎
求財不如保命保命不如輕財之語則此心之貪念
以消而此身之糾纏盡脫惡念其滅天心其復矣天

譴其寬福祿其臻矣人胡不勉而行之

特宥不恥示訓

人生不怕彌天大罪一改全消不怕立地奇功一失
卽敗通觀上帝特宥開生議重赦者類多念改議不
赦者多因毀誓其他言立功折贖援原功準兌則又
別開生路以憫斯人設法曲全以成人願而總莫非
普好生之德深不殺之仁也顧天以民爲心愛民之
心無所不至民以天爲命答天之休允宜默通乃天
牖明明人心狡狡旣不思奉天全善於有初且不計

承恩改過於以後是爲自絕人類而亦見之可哀雖
遇帝恩下逮頒宥例於寰塵聖澤俯施揭赦條於下
土而亦無幸也已爲此附加切諭羣類試各思之

特宥閨惡示訓

男以女育女以男教互有所益交而後成天地之道
陰陽之理也故有女無男則孤陰不生有男無女則
獨陽不長女以成男男以教女古君子深致意焉今
上帝垂恩既有以範其極則有以責其成而要非男
子以講明之則女子無知其無成矣是科俯頒所以

責女子尤深致責夫男子也當婦道無成其專責夫
女子者不淺而分責夫男者尤深也特爲切示尙其
省之

特宥雜技示訓

人雖至愚未有無畏死之心者人雖至賤未有無好
生之良者顧畏死不思不犯死法好生不思所以投
生今上帝恩頒科罰數其罪狀定其例誅所以示死
之由也復垂特宥原其心術准其原赦所以開生之
路也人果有知尙其省罰以知畏逢赦以求生勿畏

難爲勿牽宿愛勿不信以滋疑勿惜謗以增悔則刑措於無用者而恩靡有底止矣而何分乎正業又何別乎雜技異術也哉大道顯然如之何弗思

特宥揭遺示訓

人之惡業無窮天之恩宥無極因類見端旣罰款之難殫述原情特宥抑赦例之莫盡陳第切要者不可畧必補者不可遺罪款已經彌缺宥例所必揭明爰於正欵告竣之後重加補綴之功所有罰例已述之條更請無涯之宥幸蒙恩准合揭下頒凡爾官民均

宜謹懍

戒溺女寶訓

帝君曰吾嘗遍遊天下見世人多溺女孩兒而楚南尤甚有身居儒者亦不免有溺女之罪况庸衆中尙少此輩耶不知人雖妄爲天眼不漏故有應得科名而瓊樓減籍亦有宜受福澤而子孫貧窶甚有打胎而自殞其命壓女而亡喪其形天報不爽反謂命運之舛錯人事不修乃說神靈之不鑑嗚呼天道大生地道廣生人必好生物必貪生而惟此嬰兒口不能

言手不能動彼方投生先已致死嘆彼父母豈無人
心而忍出此耶不思有陰必有陽有男必有女天若
不生女世上豈有人天若不生男天亦不成天試思
我無母身從何處來母若又無母母從何處來我今
雖十女亦應笑開懷緹縈尙救父看女作門楣不知
是何故淹死自甘哉大約世人見女多之流以爲難
以包成衣食之計未免憂心故致此耳不知律法最
重人命溺女者以故殺子媳論而常情不懼王法可
逃天殃難追此種情弊楚多有之以吾看來有作溺

女歌以勸者有作溺女文以勸者而人心不返其將
奈何以吾思之小兒易養忽然成人嬰孩何罪豈宜
卽沉倘若家寒送養人家卽不然育嬰堂亦活命一
便也長大成人我無嫁奩誰得議之而不娶我無包
成幾見餓死而難生世嘗有終身不娶之男子未見
有終身不嫁之女人又或者恐女嫁娣嫌夫棄致受
終身之累不知人各有命貧富乃是天定豈有人逾
料耶幾見富者又貧貧者又富貴者復賤賤者復貴
何容人算就耶天道好還人心似鐵縱有傷人之事

斷無能逃之理何不返已自思而作此大孽耶今吾降此俗言取其易曉共相勸勉獲福必多以此傳世人宜知之

示諸士訓

開其良而闔其偽惟長是取惟短是棄以俟回頭者聖神交凡之道也誠其心而敬其事篤斯忠信執斯畏懼以聽感應者凡人事聖之道也聖而不如是則天人相隔無以導化元民凡而不如是則心神相反無以修復元氣以言聖神則已無可慮以言凡人則

當有可警寄言于二三子慎勉操持以成大事夫人大事惟此一心一心正於事君則可曰忠一心正於事親則可曰孝推及萬事莫不皆然人而不能成此大事則可謂虛度一生豈不惜哉二三子勉旃勉旃期成此心此心成就則何難于復元氣乎元氣修復則何難于化元民乎化元民者聖神之職人能如是則豈有不合德於天地炳明於日月者哉蓋通宣聖神之意者一曰大緣二曰大法三曰大德於此三者苟厥其一卽不可矣可不謂難哉雖然名則三而

實則不外乎一惟德斯基有德則緣與法隨之凡通
聖神之意者不可不知此理覺世經豈不云乎心卽
神神卽心無愧心無愧神若是欺心便是欺神銘哉
斯訓

同慈函

高上玉皇本行集經前序

道本無言諸經皆真聖唾迹但因言顯道文亦聖賢
之所不廢自三才分名教立理本一致謬妄者或歧
之歧之非是也元始坐照於諸劫之先當時至運會
諸真問玉帝行因遂說是經迺法品最尊靈文第一
自來經書無有及此者真文隱奧不事奇麗梵對而
旨自難窮諸聖所不能言思議所不能到此經括盡
明若指掌臣張仲事文中古供職於周祇承上帝卽

聞此經願終寶持帝偶較人間功過錄臣仲在忠孝之道命掌化九天編輯此經經中玄蘊益得飽味惜世觀經者不能體聖意契玄旨謬刊訛傳言韻或誤遂分洞玄高上二名各執私見以傳習大悖說經之意甚至膠柱狂誕之徒或不信此經或以爲因襲他典或無知強解皆不知是經之尊而罪福報應不可逃也其過何可言臣仲不忍盛典之失傳惜塵俗之愚謬誤犯無知不聞大道奏承帝命使仙真解經說義流傳凡世作窮經之關鑰爲人道之梯階庶聖經

法航可濟久溺之流玄宗妙藥易醫積沉之病聞經悟道永無妄議應機識真終免輪沉三千大千世界悉太和之域從劫至劫代代爲樂利之場求道必得無願不成是經功德斯無負矣謹序

玉皇本行集經序

天人不外一理古今祇此一心若理之所不順卽心之所不安雖帝典王謨不妨修飾之潤色之期於理順心安而止玉皇本行集經由洞玄而變爲高上累經筆削率土善信俱奉爲作聖之階梯成真之津筏

矣然大文不無傳習之訛註疏亦多謬解之弊以致辭意矛盾章節混淆有心斯道者斷不容不稍爲參酌者也是刻謹照九天秘書玉函正文共訂政一百十八字詞取其顯意取其明分章分節脈絡貫通註亦就經解經不落玄杳虛無陋習學者試取世本同觀而共玩焉孰得孰失不待言而自明倘仍執一成之見謂經不當改而改經者之適足以取罪則是天人有異理古今有異心矣斷乎不然

玉皇本行集經後序

西王母不常降玉皇經果不容授受乎何仙姑不出世玉皇經果不容參正乎天上人間書不一也而參正之發揮之其人又不可得而一人間之文如詩如書如周易如春秋不過得世之大儒足以刪定繫作蓋其文特經世之文鋪張可見故聖人獨任其責刪之定之繫之作之不能以自疑而成書之後天下亦不得以致其疑有如高上玉皇本行集經者實天上之文蘊奧難詳自非天上之至真安能測識而正其流傳之誤哉愚知夫子雖秉刪定繫作之筆使居今

之世亦必不肯輕措其手非不能也蓋天人殊途而已先自疑天下亦必致其疑也天樞上相張公子房向遊人間挾圮上一篇爲帝者師自其從赤松子遊顛神淡泊與愚共相玉清每謂玉皇本行集經流傳下世彌劫歷年茲已久矣其間舛駁訛謬已不爲少欲叅而證諸恐失之僭一日武信蓬邑真一壇生傳德普泊邑士趙燦者遽有是請於三天玉旨溫然特畀子房以叅校此經之任子房一再表辭旣不逃睿語之丁寧繼亦蒙玉皇之俞允猗歟休哉爲子房者

其被聖眷爲不薄而上天下地凡有見聞覩茲榮遇者亦何幸之厚歟子房釐而正之不徒黜訛黜謬爲有功而且於逐章之次附爲註說仰足以讚真詮之妙俯足以迪信友之迷斯經一出信乎披雲霧而覩青天矣又嘗肅容諦觀今日所正經文子房猶懼夫裁益之文旣行而世間念誦之疑轉熾乃從舊本畧正乖訛其間不無一二以俟來者得非夫子闕文之意乎茲因喻生覆蓬邑文板刻梓廣傳輒從而糾正數字附於下方然此經會奉副帥冲和應善天尊普

化天帝降序列於卷首今烏得而畧之哉喻生自宰
官身而成功德身則可移善於蓬邑士友俾復存之
無輕掩其善而專美也若然則斯經也九天副帥序
其首蓬邑諸生致其請天樞上相訂其訛濮陽喻生
廣其傳愚今又從清州和邑太乙普化壇生楊顯雄
托鸞而紀其盛繼當附降科儀而增大之則千百載
而下此爲全經將見大易運乾坤中庸贊化育與斯
經普行於世造化功用至是豈可量哉

高上玉皇本行集經序

謂天蓋高曰道獨尊人第謂其高而不思其所以高
之德備第曰其尊而不慕乎所以尊之道全蓋自一
元方兆兩儀區分有天地則有主宰夫天地者地有
主四海九州咸歸統御頌曰天子天有主三界十方
盡爲覆冒尊曰玉皇天理昭彰毫髮不紊恭攷玉皇
本行修德無量成功靡極位至尊名最勝統萬天包
三教紀授道於浮黎真境顯妙藏於紫微上宮發慈
悲心演流清淨之道廣利益事闡開太無之精玄穹
妙典高上真機顏曰玉皇本行集經其大無外其小

無內人但知爲上帝修證之書經而不知爲元始濟人之符命也人但知其三卷五品之尊崇而不知其三卷五品之奧妙也言言珠玉字字珍金實成真之津筏爲作聖之階梯故洪先纂慕皇經遂登仙境劉滿稱誦聖號已死復生是經也陰陽普度幽顯均沾上可超祖宗於東極下可福子孫於中華今觀大地衆生率土兆庶耽於情慾失却真元如蠶作繭自纏罔覺似蛾撲火將死弗知援扶靡主拯救無方然欲挽回乎天心必須尊崇於經典玉皇本行集經一書

無如降之久傳之先中外藐爲陳說言之隱意之微僧道止徒誦稱鮮有能心維其理身體其行爰命重刊以示振新惟其見聞而受持更願有無加改勉知其修真養性之本教以賑幽濟苦之傳雖難思而難議實至顯而至靈臣張仲不揣才疎誠惶誠恐稽首頓首勉爲序端

太上道德經解序

夫至人能爲至文至文卽寓至理維我太上至哉人乎伏讀尊經至哉文乎而解人不易索正恐至理之

終晦也乃或有謁殿而陳曰神寶道德經自漢迄今名公鉅卿文人學士注釋累數百餘家編在道藏各抒所見均爲尊經之補雖樹論不同而未始不邪翼乎道統也余曰然至理至文必須至解諸家之解亦云解矣而非至也解其所解尙非道德尊經之本解也卽非吾之所謂至解也一日玉清內相孚佑帝君來訪余袖出尊經注釋余披而細閱之知爲八洞仙祖闡揚奧旨不離乎道不泥乎道就文解意淺近無非高深俾千萬世後能領畧此尊經者以之爲已則

順而祥以之爲人則愛而公以之爲天下國家無所處而不當而玄綱仙譜卒亦莫能踰越其範圍其解乃至解也以至文而得至解斯至理不終晦而至人日益尊吾旣佩服乎至文吾尤愛慕乎至解也猶憶曩時與呂帝同訂天經改訛正誤筆削俱出呂帝手而余第總其成固知呂帝誠屬仙才而今又閱羣才之注則信乎仙才之筆非塵凡之所得比並而至文賴之以明至理緣之以發洩也

大洞玉經序

余之居事畎澮忽於鋤下得一金像詢之父老曰乃元始天王相昔夏禹治水冶金爲像以鎮方岳余香火奉事未嘗少懈因海風翻浪人力不能支余爲衆捨金像投駭浪中由是風潮遂回一境獲免思仰之久一夕於沙磧中有光亘天掘之再得舊像歸築宮安奉同邦人共事之積年靈感不可勝記余考妣不幸死於瘟疫余喪葬廬墓培壅旣周偶有三神人葛巾邾褐芒鞋訪余因以大洞仙經一帙賜余曰晨夕諷誦必獲善果於三才中上可以資奉父母祖先靈

魂出離幽苦中可以懺罪消災增福延壽下可以庇族救人同保安全汝可捨金寶拜吾三人吾爲汝傳奏余卽日依命設齋貢金繪奉師受之爾後晨夕誦持不輟屢獲靈驗因盛暑洪水齧浸考妣墳墓余禮奉金像誦大洞經期以千卷爲滿用保無虞次年秋雨霖霖傍溪湧漲數流爲一余益恐怖及水落視之則墳前溪谷變成堅壟廣一里餘自是松楸無害余常思雙親死於瘟疫切骨爲讐幽明路殊力不能報每朝夕勤誦大洞玉經虔懇金像願賜威力以治瘟

鬼又三年忽夢金像語余曰大洞玉經汝熟記矣大洞法籙汝未見也今當授汝以治邪魔非惟可以契汝初心亦可以佐天行化助國救民也袖中出書二卷余拜受之一曰大洞法一曰大洞籙既覺見二書宛在枕前因設香供謝恩置櫃收貯擇日出而閱之讀至大洞天騶甲卒一萬人度之句忽風雷晝暝金甲朱綬者無數列於余前俯而聽命三人執紅旗立於衆先曰願聽法令余方恍惚不覺厲聲謂之曰吾要汝等治瘟鬼此鄉張屯使家闔門病瘟爲吾驅來

語畢一持旌者領百餘人入其家俄頃執鬼五人出有蒙虎皮者冠雄鷄者貌若人者若烏頭者若驢頭者所執有水火獠翼斧鑿之具余怒而叱之將滅其形彼乃有辭曰元伯等歲運所生歲氣所成所遊有方所病有人陰譴重者受其災天命絕者致其死亦非元伯等所敢私行始自三官五嶽上奏玉帝呈世人罪狀由是帝命行下三官五嶽行病曹司案下給牒分遣元伯等一依定籍行之若蒙太一真官賜以寬貸以後願遵約束遇有行瘟見真官符籙所在卽

不敢至矣余因依經法授以教勅而去閭里病瘟者
余與之符法皆得全活余以此法錄救人之疾者衆
矣名聞遠方其士庶官吏踵門求治者不可枚舉余
積玄功妙行皆由持此大洞玉經而獲大洞法錄故
能全收神功輔正祛邪濟生度死消災延壽其後冥
冥中有大力鬼神社廟英爽來求余誦經回施者皆
謝云承真官經力增助威德遷神善籍矣或有沉魂
滯魄不得往生託夢附形來求余誦經資薦者皆謝
云承真官經力已出苦趣俱得更生矣若爲天行時

疫侵染不止但行此經行法錄中造瘟符絕瘟符止
瘟符天鷲甲卒以上收瘟食瘟吏收毒食毒吏收邪
食邪吏收炁食炁吏收鬼食鬼吏收殃食殃吏收精
食精吏治病神醫吏誅符破廟吏等九部各領甲卒
及北方黑騎天官五億萬騎蒼老麻姑金剛力士等
收捕之先牒閻王次申岱岳分委城隍社令劄遣瘟
疫使者聞經不依盟約拒正不伏退散者然後奏而
滅之夫大道尙慈太清尙善上帝好生推仁止殺行
經法錄者不可循私苛暴以招天譴但以禮遣之以

經奉之以法籙威之以善功勸之亦方便修行之捷徑也此經能解冤結除獄訟止譴拷釋呪詛解觸犯安墳宅寧軍府息兵革止疾疫祈風雨降祥瑞阜蠶穀保形命庇族屬蔭鄉社安邊陲禁蟲虎拯旱澇滅妖怪息羣凶延嗣息顯仕宦安奉祀典鬼神資薦祖宗靈爽濟度窮魂滯魄皆可設齋誦經以禳謝之其餘治病消毒有紫庭天醫之神方乃禹皇金石餘恩及乎萬世使人無天橫之傷時免札瘥之患奉教之士當尋訪受習以助仙功余證果太上不驕樂育天

帝澄真正觀寶光慈應更生永命天尊由誦經之勤遂上清之貴得受誦者勉而行之願與文昌一會中人齊登妙果

大洞經序

大凡事之有其究竟者必有其原來如洞經一書人但知爲吾學道之書而不知乃吾敘述之書也人但知三十六章之是守而不知三十六章之訛複也吾久欲定正惜未得人卽有其人始似勤恒繼謂虛渺或半途而廢者有之或已成而疑訾者有之嗚呼人

多若此吾何望焉是以急欲定正而終無由矣卽如本朝大吾道之化者賴彭氏弟兄

卽彭太史定求輩

發其源

其始之勤勤弗懈亦不可不謂爲誠篤者也繼則矜奇自滿以貴怠功始終不無二致則亦奚足尙哉下此則淺嘗者愈衆寧堪問耶雍正五年冬有符圖司教金本存疏呈洞經原由乃稱久欲欽依玄範刻志修持深苦傳本互異實難遵守懇恩勅仙定正詳註以便刊傳以廣大化閱之適契吾心且喜本存之勤恒也因勅某仙與某人爲師令其註明傳世不期某

生亦復怠慢視爲可有可無經年於茲功無十一其中雖有頗可取之人請師解註而諸仙亦只依諸傳本爲之訓詁凡章句之訛復與夫洞經之原來究竟卒未之言也吾苟不親爲詳本末定章次正字句則本存之捧誦刊刻不惟徒費心力而且以訛傳訛貽誤來茲將莫知其底止矣然吾欲親正究難得人幸天道不終剝剝極而復人心無悉困困中有亨本存而外復有華如琪其人者矢志投誠歸依吾化吾見其年雖少其信頗專爰命代吾傳筆定正字句之重

誤序解章目之始末自序經以至結經共二十四章
皆述吾成已之始成物之終者今一一爲之揭示如
每章皆有元始天王曰之句以人看之似卽吾師所
授之玉經而不知乃吾得道之後復蒙吾師授以蒼
胡頡寶珠其珠光煥爲彩雲結成此經皆序吾入門
求道保元以至成道度厄化幽悉由吾師授以玉經
而得以造夫太玄也其必冠以此五字者又吾於珠
光所結經文之上加之以誌不忘本之意至吾師所
授之玉經自吾得道後吾師復秘於大洞矣其傳世

者卽此經也夫此經自太玄受後歷虞夏商周暨漢
唐宋而迄於今屢經典廢其得不迹熄而存者諒多
記傳鈔授故錯訛互異以至於斯吾今者因本存之
誠懇華生之信篤故不厭煩囂親降校正俾本存奉
此刊傳以爲定本庶後之修習者得其源矣

九皇新經註序

吾想太初之古太上親自度人無人得度入函關始
化西胡尹喜望紫氣而得聖傳此後太上無法方注
靈文欲人向文精進世人愚昧不省察其意認爲誦

讀之篇又不得已授先天正傳吾方演科文亦欲度世也不意日趨日下世人皆以爲科文二字可以超生死濟吉凶招福禳禍孰知先聖苦心寓於內人不向裏參求隨口唱念自後諸真一出各著道書行世隱隱顯顯顯隱隱欲吐不吐又吐使人難摸難捉是以天仙無人神仙少種地仙失傳人仙不真鬼仙雜出今幸有純陽開化將已酉所演九皇新經一部復於己未又闡玄蘊細註精微五仙口訣一盤托出朝斗延年訣一口說盡使後世得所歸宿將修煉有所的指全無朦混一語並可以證諸天之寶經亦可以實諸真之道書將太上開化之心始全而後世度人有傳仙脉庶可以不絕矣吾本開教一老慈爲純陽度盡凡夫之願不覺一敘

呂祖同參經序

稽自墳典肇興而經之名遂燦然於世蓋古先聖王舉人倫日用常行之道著爲訓典於以覺世牖民使人日遷善改過臻於上治後世因尊爲之經世之典要云爾非惟釋道兩門始創有經之名以顯異而駭

俗也然梵帙瓊編亦皆佛仙啓迪人心補裨王化世
儒不察以爲與聖道相左無惑乎愚俗之輩隨流逐
波而輕肆譏談也乎佑帝君之演斯典也合三教以
立言會五典而垂訓輯四子之微言集百家之緒論
引經據典博採旁搜辨疑晰義條貫同參其旨顯而
深其詞該而備發先聖未發之秘闡仙佛未闡之精
固修證之法言實訓世之要典其所以啓迪人心裨
補王化者豈淺鮮哉覽斯典者務宜讀其辭玩其意
朝諷夕詠日進於躬行勿概視爲梵帙瓊編與聖賢

書相左也夫十室之邑必有忠信寰宇之大豈無解
人世有深種善根明達穎悟之士能依斯典而力行
之廣爲流布務使閭閻之內家喻戶曉人人有向善
之機則不求福報而福自駢臻其所以補益王化裨
翼聖賢者正賴斯典維持不少也奚第仙經云乎哉
如以爲太上勅演之靈文帝君開闡之法要什襲珍
藏終歲不一覽觀與但習爲誦持而於倫常日用之
道罔克實踐者豈帝君覺世之慈心也乎後之覽斯
典者亦當有省於予言

新增本行集經朝天寶懺條規序

伏自混沌初開儀象分判道立三教元始在無極之先德敷兩間上帝居太極之後論無定之權衡帝實操一元之主宰觀有形之書籍道乃爲三教之獨尊本行集經非僅序洞玄修真之奧旨至尊成典誠能作苦海度人之津梁誦是經者務宜滌慮洗心參究其深義字斟句酌省悔其愆尤由是超親度祖如影之隨形解厄除災似聲之應响吾嘗曠觀塵世遍閱下民橫蠻愚魯者拒而不信高明文學者信而不堅

邠士臨壇跪誦不但不能恪恭屏氣而且字句錯訛志士閱典煉修不惟不能悟妙思玄尙多身心污穢甚至隨處拋置則鼠嚼鴉塗任意取觀則污經蔑聖顯罪必遭天誅隱惡難逃神戮吾奉敕旨乩書條律以爲誦經者警

太上朝天謝罪大懺序

三教並尊理總歸於不二聖賢迭起道本屬於一途儒經道經與佛經善惡俱已說盡陽律陰律與天律報應毫末分明太上朝天謝罪大懺一書實元始之

垂慈上帝之教育也其豎義立辭與聖經格物致知之意誠意正心修身之道並行不悖矣爾時元始上帝坐居紫微之臺放大光明照諸世界觀見受苦衆生造作非善廣結怨仇不敬天地及三光不孝父母與伯叔欺神滅像謗聖毀賢瞞天昧地使心藏呵風罵雨隨口出五穀不惜六親有疎大斗小秤靡公平明瞞暗騙多詐偽姦盜者多多邪淫者比比天不容地不載官非瘟疫而難免陽網疎陰網密刀山劍樹亦堪憐於是放大毫光廣大會力一字一珠成寶筏

闡開大道流演真經一言一語作慈航千生妙法萬劫醫王其理明其詞切可以警賢智可以教愚頑人天欽奉今古尊崇大哉懺法破長夜之明燈甚矣慈悲濟四生之良藥爾諸世人果能依文改悔遵懺奉行何災不滅何福不增滅罪之良規培福之妙典無越如此矣無如人心愈詐世俗愈漓知過不改見善不爲早欲亂示未得其人今幸此地募化重刻捐貲復修其字間有差訛奉旨改正誠有裨於盛世故恒尊於歷朝得是懺者信心奉行踴躍懺悔燃燈而照

昏曠鳴鼓以醒愚聾宏通道法化行俗美欽此欽遵
各宜諦聽庶仰體上帝好生之心亦不負諸仙乩示
之意矣是爲引

玉局心懺序

吾奉帝命簡玉局真官降勅人世自甲寅仲秋始也
迄今六載教立學荒心甚憫焉因準真官所請敬演
心懺一部宣示頒行一曰歸誠二曰首罪三曰赦過
四曰省幾五曰定志六曰篤行七曰養性八曰化物
九曰事天而未復自序其意嗚呼真官此言別理欲

也辨吉凶也明生死也四子之書五經之蘊括於此
矣文莊則當頌義實則當循象嚴則當信嗚呼聖人
以神道設教豈得已哉

太上感應篇序三則

惟天下之大聖有以維風易俗著爲成書四書五經
惟士子習之至於盲瞽之愚民則不能上口烏能動
其心乎粵稽古訓乃有常經此太上之所由作也其
間判善惡之毫釐欽鬼神於屋漏上而推之希聖希
天下而守之亦不失爲善人君子嗚呼惟我上帝眷

顧下民日求之於形聲之外乃反不積功立行以答
雨暘寒燠之恩以報食毛踐土之德乎是書勤勤懇
懇昭布日月日用常行之際試於平朝之時思是書
所列有不汗下沾裳羞慚無地者乎有不歎人難對
神者乎有不懽忻鼓舞自快者乎有不反躬無過可
以對神者乎子美詩曰文章千古事得失寸心知予
亦曰文章千古事善惡寸心知間取尼父之書訓詁
之若昧昧不知安望有獲是之謂掘苗助長立見其
槁矣王子將此書集衆美而大成將以訓夫天下也

然余憂天下聰明才智之經生反甚於愚昏之細民
愚夫愚婦聞果報之說則驚心動魄變而易者有人
至於讀書談道之士反守其固陋之習以鬼神爲虛
誣以報應爲恍惚以人倫日習之常經爲不足異以
戕賊物命爲不必戒以上帝神祇爲萬里之隔以柱
聖西天爲三教之異若此者其心已牢固不可拔奈
之何然此書皆言理之言諒有同好董生曰正其誼
不謀其利明其道不計其功旨哉斯言有味乎其與
此書相合予勸天下之士大夫以身傳子子傳孫承

承不斷非惟求福田利益久之亦在其中矣請覽是書者皆作雞鳴平朝時想正好下手做工夫也

上天無私隨人感應凡諸禍福決自己求積善餘慶作惡餘殃理所昭然毫髮不爽感應者乃太上教人修身立命之本爲善去惡之根夫何視爲常言等爲故紙乎獨不思人生天地有官骸肢體之形卽有血氣心知之性孟子云仁義禮智非由外鑠我也我固有之也又云凡有四端於我者知皆擴而充之也今觀諸世天性日漓僞心日起見一善輒以善小爲無

功而不爲者有矣見一惡輒以惡小爲無過而不去者有矣嗟乎善非小不積惡非小不成苟至身名俱失而後嘆人生之難得復世之難期豈不悲哉豈不晚哉吾是以不忍斯民終於不悟不辭誥誡再行訓誨點破癡迷先正人心次需教化士居四民之首爲流俗所觀型爲庸愚所則倣舉凡立身行己應事接物有悖於綱常有乖於倫紀者惟於感應經省之悟之則可以悔之懺之果能心心念念勉勉皇皇遵感應爲法戒奉聖訓爲勸懲常常佩服時時省察敬而

信之力而行之勸勉而樂道之不心非而口議不勤始而怠終不以應緩而疎不因無效而悔將見一人爲善去惡人人因而革故鼎新一家孝友成型天下因而雍和成化庶幾士行日敦風俗日淳人心日古世道日隆康平之福不祈至而自至無妄之災不待祛而自祛一則體太上垂訓之意二則慰聖主教化之心是余衷之所厚望者也世人其敬之勉之哉吾一十七世爲士大夫未嘗虐民酷吏周人之急濟人之乏容人之過憫人之孤一心如此聽命於天故

能久證真位今勸世人每日侵晨持念玉皇大天尊玄穹高上帝尋聲赴感太乙救苦天尊九天應元雷聲普化天尊玉虛師相玄天上帝金闕化身天尊四位聖號誦太上感應篇一遍以消罪愆遵以修行庶持念聖號靈篇得以感應自然福祿無量子孫榮昌金寶入門仕宦卿相各宜書寫此經一帙日夕瞻視依此修行禮念玉皇聖號行之二年萬罪消滅行之四年百福皆集行之七年子孫賢明榮登科第行之十年壽命延長行之十五年萬事如意行之二十年

子孫爲卿相行之三十年注名仙籍行之五十年天神恭敬名列仙班胡不勉而行之

濟世寶筏序

天之所好在欲爲善而不欲爲惡也予之所惡在欲爲惡而不欲爲善也所謂皇天無私親於有德者人性之初本有善而無惡奈何多過而鮮於善也皆由一念理欲之分而有天堂地獄之判余司三教稽查人間善惡職掌二籍考定下界科名崇於善未隸吾籍而登錄之榮其身而福及子孫崇於惡已隸吾籍

而降黜之誅其身而殃及子孫然禍福無門惟人自致所謂天作孽猶可違自作孽不可活此余之所謂也余自飛鸞開化諄諄訓誨殷殷教誘脛切昭然惟恐弗至自古聖賢著書垂訓無非欲人爲善去惡故見一善則獎勸之以成人之美見一惡則懲創之以抑人之惡爾諸世人猶未惕勵自新各體其情乎追憶余垂訓之後讀吾訓而能身體力行得大魁者五十餘人登黃榜者一千八百餘人舉鄉薦者五千餘人皆考其功之大小定其爵之尊卑其餘尊崇吾訓

刷印布施爲之消災延壽益嗣裕後者未可數計惟視其誠敬及素行無虧者較量相予耳厥後將所增斯訓示於顏子以爲註釋奈顏子恐人私議未敢增入復授於潘子註證刊布闡揚於世未見其廣刊者仍是舊文增者百無有一今見諸生等欣然有刊布之志吾親至鸞壇乩書序言布於篇首以斥疑議茲後得此書者勿生揣疑信心力行祈名求子禱病延年無不如願如潘子賦生之初未入籍內敬信吾訓修德行仁榮登科第福自求也如李登降生之時原

隸籍中背吾典型昧理喪心甲榜除名禍自求也所謂報應昭昭禍福無不自已求之者孟子亦云求則得之舍則失之是求有益於我者求之有道得之有命是求無益於我者豈非人求之自致哉然改過遷善之法無如感應篇陰騭文功過格等書我願世儒奉行勿替常常佩服時時省察敬而信之循序而力行之歸於有善無惡之地爲天地間一正人君子慶期頤於現世膺爵秩於子孫而長享福澤於無窮也上天降鑑豈負汝哉復續偈云

不喚暫迷喚久迷

不喚久迷喚執迷

暫迷久迷容易醒

惟有執迷難轉移

遷善寶筏序

惟夫受氣成形則有耳目手足賦理成性則有仁義禮智是固有之良各具之也稟彝之德豈有異哉惟聖人自全之賢人勉全之若夫中人氣稟所拘漸至失其固有物欲所蔽遂覺喪其本真故特降戒士文及陰騭寶訓鴻文等篇無非欲人遷善改過以復其初心增美釋回以還其固有無何世風日下所爲盡

奸盜邪淫人心日漓甚至敗綱亂紀因結成劫運上千天怒吾神職居開化甚不得已復承帝命降於武攸鸞書存心格言救劫等篇教人盡孝弟忠信以及利物濟人諸善事而其厚望諸生者尤宜凜凜自持正己以率人勸勸化願人而猶已越自去歲諸生等有志刊刻諸聖訓文誠心請序將見積善慶作惡殃易有明訓惠迪吉從逾凶書有至言天鑑在上報應不爽特降鸞壇書數言以弁其首云

勸懲輯要序

嘗聞一時勸人以言百世勸人以書以言勸人所及者不過蕞域微區以書勸人所到者無遺山陬海澨吾神德雖未優執掌文衡之柄位鎮三界尤司開化之權錄過錄功分毫悉登於策籍加壽減算報應不爽於錙銖自丙子以來同諸仙衆飛鸞降世勸化生民書救劫降正心刊濟世與夫孝經鴻文諸書建八仙造萬壽架救劫以及禦難神鎮等橋其餘修道路以利人行築庵廟以妥神居判修數十處乩書數萬言無非引人爲善復其固有之初心戒人莫惡去其

喪沒之本念茲幸諸生欲採詩文付於剞劂取曰勸懲蓋欲勸人盡孝弟忠信懲人去奸盜詐淫顏曰輯要輯其關人倫風化要其係創始開端俾天下後世見是書者咸知勸懲余故乩序數言以冠篇首

功過格序

善惡者功過之未形者也功過者善惡之已見者也人性有善而無惡奈何多過而鮮功皆由一念敬肆之分而天堂地獄遂判入乎善則爲賢聖入乎惡則爲下愚今天下自命爲絕世聰慧之人者我視之皆

絕世懵懂之人也百計欺人豈知神不可欺多方瞞世豈知天不可瞞所以報應隨之不及其身必及其子孫耳太上有言曰吉人語善視善行善一日有三善三年天必降之福凶人語惡視惡行惡一日有三惡三年天必降之禍則善惡之念慮一萌鬼神早已窺見肺腑可不懼歟蕉窓十則懲勉備焉陰騭千言勸戒具焉皆所以發明感應篇之旨要亦同條而共貫吾不忍人之安於下愚亦甚樂人之勉爲賢聖思夫檢束身心防閑性命積功懲過之法無過功過格

一書我願當世自好之士奉行勿替案頭日置一冊勿以善小而不爲勿以惡小而爲之勿冒功而勤寫勿文過而停書發憤有爲是誠在我行之久久自期于有功無過之地而爲天地間一正人君子予以慶者願膺爵秩蔭子孫而長享福澤于無窮也我其負汝哉

陰騭文圖說序

天下必爭者富貴功名而甚惡者貧賤窮約誘之以所必爭惕之以所甚惡此予作陰騭文意也是文傳

世數千百載遵而行之則爲聖爲賢而富貴功名其所兼收者矣背而馳之則爲愚爲不肖而貧賤窮約亦其所兼收者矣夫遵行者不必作富貴功名之想而其取富貴功名也如操左券背馳者不必有貧賤窮約之思而其致貧賤窮約也亦如操左券孰得孰失此不待再計而知者也今世之奉是文者吾見其朝夕頂禮矣吾見其朔望諷誦矣吾見其刊板印施盈千累萬矣而往往不如其意之所期豈予言之不驗哉毋亦未明乎文中之義而行之不力行之不功

故感應之理有時而或爽歟於此而欲使文中之義大明於人心非得善信之士闡之發之不可黃子正元憫世人徒奉吾文而不明其義也爲之逐句註釋註釋之後兩列案證案證之左各有圖形俾天下識字與不識字之人共知法戒善哉與予作文之意殆深有合焉者乎爰喜而弁之以言

愆海慈航序

淫爲衆苦之本色爲諸孽之根報應之速如影隨形昔人言之甚詳然蛆居厠底甘穢如飴魚在釜中臨

危不覺雖有正言莊論塞耳不聞也久矣不知世無
剝而不復之理人有昧而轉覺之機今試執登徒之
輩與之齋居端坐苦口而告之曰爾勿貪淫爾勿好
色有不點首稱善者乎即此稱善之一念擴而充之
於念念則明眸皓齒直如馬面牛頭艷女妖姬不異
冤家債主誰謂正言莊論不足感發人之善心而懲
創人之佚志哉黃子正元廣採閑邪諸論集成一書
為愆海洪波中設慈航寶筏予不禁深嘉而樂與之
爰為作序而付之梓

開化末劫序

元皇帝君開化末劫為爾下民誥誠曰天理循環運
行不息神道宰輔運用無窮自人事變遷無定氣運
有厚有薄其天運周流也冥冥太空高位不寧日月
星辰風雲雷雨而氣數為之異常其神運輪轉也星
宿遞降文武官員士儒僧道而本性為之牯亡至於
凡民無知澆漓成風父子兄弟夫婦朋友而氣運為
之不和以致黑氣觸空抑鬱太上結成劫運而不已
也自上劫以及中劫屢屢降災固無論矣今逢末劫

之際天運無常自嘉慶丙子年迄道光辛丑歲廿有餘載其間文武官員士儒僧道天下凡民等過惡多端歷歷可數爲文者欺君貪祿弄法害民遇考試大典不論文才不取德行或徇人情而以世家爲重或賣關節而以富家爲親理民間政事不遵律法不憑公道或欺壓小官陞降爲取財之術或詐駭鄉民枷鎖卽謀利之具奸則多矣忠何有焉爲武者勇斷自恃不講知方當朝廷無事之日不教兵丁不習行伍日則牌棋偷閒夜則花柳情重及國家有事之秋不

能致身不禁兵亂或則強奪人妻或則虜掠民財軍則有矣法何知焉爲儒者徒誦詩書不習精義或苟且而延歲月喜看淫詞好談閨闈或徼倖而圖功名出入衙門欺詐村夫禮義廉恥全然不顧名則士也實何有焉爲僧者與爲道者以削髮出家爲名反貪取妄爲爲業不能演習經典不能教化愚人徒要布施誰結善緣口說慈悲心實殘忍淫慾妄念種種難除而於三歸五戒之理修真煉炁之道彼何有焉若夫凡民不堪言矣若男若女苟合成風爲工爲商機

巧成俗大秤小斗皆利己損人之心明瞞暗騙設肥家潤身之術或好逞剛強傷人之命者有之或包藏禍心傾人之家者有之如此頑民難以盡言自官員以及庶民更有一事可痛者西洋之國陰藏毒心造成濃煙名曰鴉片無論貴賤無論男女吃之有味却之難舍喪却精神懶習事務耗損元氣難保性命甚至以煙爲籠財之術以煙爲偷色之媒由此而喪身亡家其禍更有甚焉者非必普天之下無忠臣孝子仁人義士輔正天運而不忠不孝不仁不義者生於

其間天亦未可如何也嗚呼民哉何爲而至於此哉民之爲惡如洪水而不可挽如猛火而不可遏天卽結成水火劫運而降災而警之民之爲惡如瘟疫之害人而不可救如疫氣之流行而不能止天卽結成瘟疫劫運而降災而懲之且民之爲惡如利刀之傷人而鋒刃難禁如強兵之殺人而心思最忍天卽結成刀兵劫運而降災而罰之是民運太薄而天運亦薄神運與之輪轉不已也吾願人心復初忠君孝親稱仁道義除一切奸盜詐僞等事可以復天運可以

復神運可以免劫運卽皇運昌明國運興隆如太古之淳風結成一雍和之氣運也豈不美哉吾今主宰文運操富貴貧賤之權定壽夭禍福之數著明全書代天宣化遵從者少而違背者多信心者寡而疑謗者衆幸得涂子設壇純陽上洞主盟命仙童行化真君降乩開化續刻全書一卷其事可取其心可嘉夫予著全書之心體上天之心以爲心也仙童命人續刻之心能體吾之心以爲心也涂子以及諸生募化纂輯亦能體仙童之心以爲心也剞劂告竣問序於予予承天運行化主宰元皇神運乩書俚語漏洩玄機以爲救劫運之總領焉於是樂爲之序

夢醒錄序

爾時朝奏金闕捧讀玉函天榜甫書醮章遞請適逢太陰將誕偶遇關公過駕八將乞序九天半鸞降乩雙溪體上天慈悲之心憫下民愚昧之苦以先覺覺後覺爲一世世萬世真仙之英靈不昧經典之註釋甚明前本日覺世經此書名夢醒錄正氣充塞天地至理彌綸乾坤言言金玉休作瓦缶之觀字字珍珠

勿同泥沙之用行間現出鋼刀斬破迷魂一陣箇裏生成寶筏渡過苦海三途代天宣化常顯赤兔之靈願人遵行莫作青龍之鬼幸涂姓以設壇助羅生而付梓悟真靈先誠道同纂一堂詩書禮樂春秋並傳萬古鸞筆拜書俚語弁首

玉定金科例誅輯要序

易曰乾道變化各正性命保合大和蓋謂民受天地之中以生各受天命之性而無少差忒也夫命者性之所從出性者命之所由成天壤間有形斯有氣有

氣斯有理理之所在性卽具焉性之所在道卽行焉而要其性道皆噩然具體必聽命於心以致其用而後其體不虛其用不竭然則心誠人之主宰統性情主四端具衆理而應萬事者也使毗陰毗陽枯於外馳詎不戕賊其仁義禮智之體無以發用而爲惻隱羞惡辭讓是非之準且悖逾其孝弟忠信禮義廉恥之道哉是以古之神聖相傳堯授舜舜授禹舉不外精一執中之心法若湯若文武曰德曰仁曰敬曰誠言雖殊而理則一亦無非所以明此心之妙也亦越

春秋世衰道微邪說暴行有作臣弑其君者有之子
弑其父者有之孔子懼作春秋彼其書法誅心惡維
嚴迄今觀其書許止之弑父趙盾之弑君不可恍然
於孔子奉王法以正人心之極矩哉洎夫戰國天下
楊墨孔子之道不著邪說誣民充塞仁義仁義充塞
率獸食人人將相食人心之不正亦至此極也孟子
懼閑先聖之道距楊墨放淫辭距詖行息邪說承先
聖以正人心偉哉孟子之功至今共冒何乃世運不
齊遭火於秦偏禠於漢晉兩唐數百年間人處其中

咸如盲瞽之不見天日維宋以文學開基純儒疊出
挺然而繼千餘年已湮已墜之道統天下國家有如
洪荒開昧人心爲之一正遞於金元又經九十年之
駁襍天下人心更漫然不堪問矣明雖有作瀝洌無
端幸今賢聖相承臣鄰輔翼掃僞學以崇至道息邪
說以正人心朝野上下名正言順中外遠近從欲歸
心所謂如雲如日作君作師治定功成禮明樂備道
德齊禮刑中罰公千餘年間未有出乎其右者也殊
聖化於昭民心異向相習乎便辟詖行馳騁乎淫辭

邪說謂命由前定謂劫遂適然謂善無益謂惡無傷以孝弟忠信之道爲畸行以禮義廉恥之行爲迂濶嗚呼作孽如此非皆由心之不正歟我皇上仁育而外繼以義正吾觀律例一書舉綱張目備例詳條更不憚詞之再三而諄復誠以好生之德寓於五刑之中卽刑官濡筆權衡精詳審慎亦莫不見其獄成而孚輸而孚也夫如是宜其民協於中率履不越無然畔援無然歆羨誕先登於岸也已又奚容贊一詞於其間哉顧自宋奸王安石以來以文章取士小人之

儒遂以五經四書爲博取功名之技而實學淡如其愚夫則又以五經四書爲不能學而理道棄如德禮之化雖盛且隆奈陷溺何刑罰之加雖中且嚴奈逃漏何於然而欲正人心以復古風必更有說以處此羌乙卯之冬先天杲勿翁與新遷南都刼司慮刼數之汹湧悲人心如狂瀾欲救無術籌挽莫能策商之下予忽恍然今人之肆惡無忌也由心之不正不畏國法之嚴者惑於逃脫漏網之說也殊不思逃脫者祇如鴆酒止渴漏脯救飢非不暫飽死亦及之蓋明

明昊天定罰在無形之際按坐重立意之初是縱可逃乎顯戮而終莫追乎冥誅苦螻蟻無知以爲陽主刑戮其身形陰主譴罰其魂魄庸詎知天子代昊天以行化昊天先天子而立法天子定律實奉天而行義也天子行法實天假之手也陽有名法天先定金科以主之天有金科陽乃有名法以行之吾竊思之名法定例嚴於誅跡恒畧於誅心金科定款嚴於誅跡且嚴於誅心然則欲正人心以復古道孰若請頒金科垂之下宇之爲善也憶予三年前擬請頒不果

由今思之誠非此不爲功旋協通都司仰體帝德詣闕懇請殊帝恩俯允而信善難逢傳述見背及明年之冬乃得人得地遂領勅傳知都司屬武昌顯祿二侯會同本宮仙衆隨壇述錄第世難年荒民艱資斧且條繁牒蔓人苦披觀用酌述者就簡刪繁宜時中弊其中布款有義理深諱者勸訓之定例有輕重相錯者發明之輯爲成書普示官民務使達者瞭如指掌卽夫婦之愚可以與知焉閱三載乃告厥成功嗚呼自是書出庶幾一鏡當心肝腦塗地雖族別而心

各異行僻而心不端當亦爲之一正也特有庶頑而爲讒說者曰非天子不議禮不制度不考文予何得主請輯述金科其文其款如律如例與名法而並行乎吁是科也定之上帝祕之玉篋予第述之而非予之作也卽予之作予亦欲正人心以承先聖而佐聖治以救斯民於四劫中耳彼讒說殄行震驚耳目蠱惑人心予縱怒而不聖抑何爲哉况民者國之本也民以嗜欲陷心而將入井不有損於國本乎不能從而設法以救之是爲不忠好生惡死人有同情以道

援溺聖聖同揆人以沉溺罔覺而陷之劫不亦垂危將死乎不能行道以援之又爲不仁是則呆勿翁南都司之商與吾之協應其請蓋亦欲爲聖主盡萬一之忠於斯人解一面之網也罪我何辭讒我又何辭抑予聞之有謂是書書法比勝春秋與諸經傳述者當並孔孟及諸先聖此乃樂善之深心憤時嫉俗感激而行譽者也吾何敢當吾亦願學孔孟闡先聖之心法正人心以正性命而保合大和云

玉定金科特宥輯要序

特有輯要序

奎

天心編

嘗聞順天者存逆天者亡蓋天者理也理者性也人惟率性而行則理順理順則心虛心虛則以之應萬事而咸宜人惟矯性而行則理逆理逆則心昧心昧則因之蔽衆理而無爲夫惟順逆異行而天之賞罰出矣抑惟順逆無常而天之宥赦行矣嗚呼天何有罰逆理相應也天何有賞順理相詔也天何有赦人之順逆無常與之轉移而旋相爲反復也此消息自然之理三才妙用之道伊古聖賢言之特詳洎自大道不明邪說襍出人遂莫知夫理之順逆吉凶之故

而浸以陷溺於無已焉上帝監觀因準夫逆理之應而定之爲罰準夫順理之詔而定之爲賞又斟酌於順逆無常之間妙用其轉移反復之道而定之爲赦例此四劫金科之所由成特宥之所由定而優賞之所由著也予忝居北極分司賞罰之科職掌南衡總糾善惡之籍俯察羣類紛然逆理而行仰冀挽回愧無化人之德竊惟懲惡卽以勸善春秋所以擅誅伐之權明法足以正心呂刑所以繼成康之治爰不避譴劣請降金科固慮冗多分命輯述喜天心有悔禍

之機人事有嚮明之會得地得人輯述適竣於春仲
洽心洽願黎棗告成於夏初特以善惡之機一彈矢
也人心之轉一雲氣也有以迎其機則發之莫遏有
以妙其轉則用之無窮若然則金科雖頒足以懼止
其惡以發其善而不有赦例以迎其改過之念以妙
其轉運之用而理方幾希之萌不仍使之昧昧無明
乎用更登金闕懇請再頒特宥復幸天恩俯允人各
同心旣黽勉勸成於前更踴躍圖成於後茲者特宥
稿完鍍鑠將竣承辦諸生潔誠請序予聞之不禁爲

之欣然也曷欣乎爾欣乎人心將復天理將行大道
將明世風將復矣而猶有歉然者時荒人倦賞字未
能請行雖然此機已轉天理將與人一又何憂乎賞
之不行也耶後有作者吾當爲之搦管以書是爲序

玉定金科例賞輯要序

金科何爲而作也上帝圖輔陽治以永休明而作也
蓋世運之否泰不常人心之剝復不一純雜相間善
惡各殊作之師宣教化勸訓以齊不齊作之君明禮
樂刑賞以一不一道非不備而治非不隆也然而孔

孟之師教不能不阨於當世堯舜之君治不能不阻於四凶况人藏其心不可測度在周公之聖莫先知管蔡之變地乘其險習汨其天在高宗之賢莫遽戢鬼方之亂是卽有聰明睿智之人繼天立極以綜君師之任有禮樂教化慶賞刑威以平其政而不能無遺治焉惟冥冥之監觀最赫察善惡於不覩不聞之中洞向往於至隱至微之地妙賞罰彰瘡之權申鼓勸懲戒之意以戢叵測之心於未形以懲斂跡之惡於將作隱德無稱爲之發幽光以昭其勸回心改過

爲之開覺路以作其新陽或遺之陰無漏焉則庶乎惡根芟除隱善無沒惡者懼善者勸八方之風氣雖至不一萬類之習俗雖甚不齊佇見其罔不率被矣天子臨朝豈不致治休明於無已乎故曰金科之作以輔陽治以永休明也特以藏之玉篋人則不知數千年來歷數代更其爲治也故猶不免汗隆升降之慨欣今聖主當陽治隆三古吾深慚輔翼期出以佐休明而未能爰應杲勿都司之議請頒金科昭茲來許明賞罰以分善惡藉勸懲而正人心以佐休明於

勿替聊以展輔翼之深情於萬一顧誅罰與特宥二籍均幸潦草告成吾以人心陷溺由於不明善惡之幾而要其知所以去惡卽知所以爲善且善惡無兩立之勢去惡卽以爲善賞罰無不行之時非罰卽以行賞則誅字一籍旣詳其所以爲惡而當罰反而求之卽知所以爲善而當賞故誅雖言惡而善已昭明例雖言誅而賞已並見彼有例賞一籍詎不可以隱而不出乎又奚必爲之贅述上以竭吾神之瘁下以損人間之費哉乃從壇諸善僉謂明其罰而天下之

爲惡者懼明其宥而天下之改過者堅尤必明其賞而天下之爲善者乃勸所以掀動良心鼓舞善機賞之一冊收功宜什伯於誅與宥矣吾嘉其與輔皇猷期永休明之意有合因允厥求遂請並頒以與天下共見今幸天與人欽棗梨告竣而諸善信又以序請憶吾之所以請頒之意與諸生之踴躍壽梨及金科之美利無窮爲巔爲末在誅宥垂成已分析揭示簡端矣茲亦何從而更强爲之序哉或曰金科之作蓋實有由其所以故初未之言倘猶任其混沌而不爲

之鑿破不幾令天下後世之閱者致嘆於賞罰再行而昧彼上帝之作以佐休明於勿替之美意也歟用不避繁言明其所以作之之由弁諸首以爲之序

降乩原委序

降乩之道人莫知其由也乩命自上天起於唐代因中劫人心不古道德天尊命吾飛鸞顯神代傳感應篇降筆教化天下夫人何以必設乩也卜龜卜著神不能明以告之而趨吉避凶究無所主惟誠心扶乩鸞筆指示然後分明此乩之所以謂爲卜疑也神何

以必降乩也莫見莫顯人不能明以見之而勸善懲惡究無所言惟顯靈降乩借人扶托然後昭著此乩之所以謂爲顯神也夫乩非專在於箕也借箕以請神所以測機而取信也乩非徒名夫乩也賴乩以顯化所以知幾而明理也人之請乩者必恭必敬必誠必信素所爲取信於神明精靈付之其乩可信也乩之所降者教忠教孝教仁教義其理無異於人道遵而信之其乩卽理也人不信夫乩當信夫理理有可信雖神道甚遠亦猶在邇理所當信雖乩道甚隱亦

猶至顯何今之背理而不信乩者多耶謂乩不易請必宦家而始能請之不知皇天無親惟佑善人人苟行善雖賤者必保如赤子人苟無善雖貴者而視爲庸人乩之所降不論有位無位祇論有德無德也謂乩難請神每多邪妖附之不知好善之士至誠感神人苟無誠則邪妖必降之以禍人苟有誠則神明必降之以福乩之所請祇論有誠無誠不患有邪無正也茲涂子設壇請乩開化日與人講忠孝節義並未勸人奸盜詐僞何以不信甚至周旋應酬無非利人

損已何以不信使假托乩筆則神必不容使邪妖附乩則家必有禍而何以請乩之後涂子之目疾昏而復明耶而何以數年以來涂子之家道平安如故耶由此而世澤繇延其後有未可量者涂子勉夫哉毋聽人言毋生退心人之不信者道高毀來德修謗興此之謂也吾神職居開化亦不恨人之毀怨人之謗但毀者謗者不信吾之所言日流於污下而不知所返可深惜也嗟乎猶是人也何以警之不覺教之不悟無異於禽獸也夫禽如雌雉亦知見色避人非見

幾而作乎獸如獒犬亦知殺賊報主非測機如神乎
鳥尚知幾獒尚測機人爲萬物之靈不能信乩之理
而知幾測機不特無異於禽獸反不如夫禽獸也非
必定信乩道方爲完人而究之乩言之理卽完人之
道人不信夫乩則所爲孝弟忠信禮義廉恥猶信也
人徒信夫乩則所爲奸盜詐僞邪淫貪婪猶不信也
吾願世人改過遷善所行合吾所言其信乩也可卽
不信乩也亦可

不忘函

紫府飛霞洞記

吾舊生越嶺間按越嶺爲郡居天下之西南角得坤
之用在漢時戶僅十四萬其俗多營窟版屋而息如
上古穴居野處之世其地則多土礦巖穴接黎之邛
苻都雅之靈關迨自唐大斥土宇包夷荒而郡縣之
民不堪命越嶺遂與中華壤斷土隔真人幸啓偃兵
息民執玉斧而劃棄大度之外越嶺遂淪嗚呼吾將
安歸當以黎雅爲鄉也黎之邛嶲關有靈應洞乃吾

之變化所惟古蒙舊屬漢嘉之青衣其俗淳厚簡古
如周民好善堯民可封其地襟帶巖巒如太華之磅
礴岷峨之嶙峋吾嘗愛而居焉近奉帝命往來全蜀
至則寓之而行化恨藜莽掩翳如小有清虛之所吾
必久留邑下苟洙父子念此甚久吾知而直命之乃
忻然於吾殿後斬荆榛去茅菅爲一洞天費僅二十
萬錢屋穴皆備吾揭爲紫府飛霞蓋本班固賦西都
據坤靈之正位倣太紫之圓方與王勃記滕王閣彩
徹雲衢霞鷺齊飛之義上以示吾不忘故鄉之意下

以期有志於攀鱗者休哉蒙山之下亦有變化之所
矣後之人有能自勵而期爲汗漫遊者乎然東山舊
祠興自紹興丙寅逮今年丁卯始克有洞穴且洞穴
不成於他人而成於苟洙父子亦有數也一日苟洙
欲紀年月曰此事非神其誰宜爲吾亦爲忻然親書
於石開禧三年六月十八日

護經函

玉皇本行集經跋

真經昭日月寶誥出圖書諒哉垂千萬億劫至理祕
書具在天地間堅而不朽豈非天地之元根乎三光
待之而益明國祚賴之而永鎮自世道不古人心澆
漓尊經流傳於世傳之者得以妄其真讀之者得以
歎其舛是故愈趨而愈下真經旨要得以訛而益訛
矣討論經義非蓬邑諸善士不足以究玉經之差殊
非天樞大道君不得以證尊經之互異大哉經乎煥

爛於世昔之差舛者復覩混然之經也其如天地立
心爲生民立命爲萬世開太平之地乎予前坐玉蕊
宮見秦生者慨然以刊尊經爲請孜孜不倦吾甚美
而讚之果未半載而經板成復叩余爲之跋其志實
可嘉也倘人天以秦生之心爲心能誦其經於口復
持其經於心福庇幽顯運扶國祚將見平步清微造
此玄玄之境猗歟休哉予故頓首稽首敬跋於後願
是經當與天人共之

觀物函

敬齋銘

曰心曰心絕相無色守而勿采養而是直有何妙法
難言難測輝天鑑地安民匡國切莫役形隨時省力
若也放忽其何喪德以人學獸聖所太息且戒且慎
無敢忘惑方便自在敬字一則寤寐無滯禮復已克
六六春宮太和其域真一是本本無雕飾笑而更察
得兮何得勿忘勿助以完稼穡持操安安秉心翼翼
奉順天命靜中兼默功圓行滿人亦太極立世施法

雪巷松特

心箴

心兮本虛應物無跡來照于鏡形影不差鳶飛魚躍
天理自然水流花開玄機任如徐徐不息一氣捲舒
衆星燈羅羣嶽棋置陸走海潛林棲穴巢類萬難記
名億不知森羅萬象冥無涯際師聰莫及離明難盡
凡我同志細省潛究逐物移志仙宗所戒對境沒頭
佛祖所忌因事害理聖人所惜學莫外馳行可內省
內則方寸外則宇宙方寸而廣宇宙可藏宇宙而狹

方寸難得此亦進工本體則無有闕有理無惡無善
爭路早開教法端興羣性乃殊仁義以一衆形不同
方圓以齊事不外乎仁義之包物無脫焉方圓之圍
嗚呼大哉天地之道生無其方方無盡方嗚呼大哉
天地之德育無其力力無量力稟無盡方受無量力
物物生成鬱鬱葱葱物物之中惟人斯靈人兮人兮
條理井井上古結繩政之所醇穆穆熙熙無瑕無疵
堯舜及禹政之所肇淳淳乾乾有岳有牧千古正規
緜緜連連後聖後賢賴以導化乃傳一貫仍說性善

法天地法立斯人紀三綱旣睦五倫亦序三才之德
於是乎一氣象純全太古可復以之于今一脉尙存
然而邪正相爲出沒金沙未淘玉石不琢世人世人
嗟乎嗟乎嗟彼愚頑冥冥昏昏認邪爲正行惡自善
不忠不孝無信無禮頹敗三綱斃傷五倫心違家訓
身犯國法無忌無憚自樂自得怡然乎衷坦然乎表
俯臨此流不勝悲憫爰告紫垣受職開化便宜十方
跡遍沙界分分法身摧邪除魔重重法舌崇正培道
建壇設醮靡處不應與我同職伏魔孚佑行同鶴駕

住同鸞筆共力共力挽回不富天譴累下幾收厥職
幸蒙海宥容俟稱職天威之下感恩刻骨率真導化
暫不休停喜逢高弟東海之隅願深誓固切切濟衆
求我以方索我以便設壇虔禱惟經斯授我答何以
惟一忠孝我答何以惟一道德道德無相壇名無相
忠孝有爲經義有爲無無無有無有無無互爲體用
相作表裏盡忠盡孝丈夫本事明白千古芬芳萬世
不忠不孝人子大辟王法所誅陰律所禁於斯二者
人禽判焉於斯二者苦樂係焉在世丈夫可不省哉

在世入子可不察哉從是則道非則不道從是則德非則不德道德非玄忠孝非難循吾天理於忠於孝一動一靜忠孝發亮只忠只孝卽道卽德推及萬物其仁煦煦測在萬事其義貞貞一實萬分會萬爲一此猶強說本一而圓以言其體無涯可定以言其用無數可量無定無量有妙斯理斯理之微無兆無昧斯理之大難思難度名之心乎名之性乎心則非心性則非性只然只如僅得小似若或暫爲滲漏可惜載誠載敬然然如如無相不滅有爲恒存莫言壇已

心兮本虛

珍愛函

南宮符命

人生之大事都在於孝之真不真天民之弘業盡關於誠之切不切行法弟子兼斯二者勉旃勉旃天君泰然百體從令主人真實萬事如意奉法如理勿拘私慾常降爾家同濟羣生

修心養性篇

大凡人生本稟天理無爲真性誰高誰下妙圓一相至昭至靈無待乎修究無有乎變幻而邪見忽生於

六塵正念乃昧於一真知耶不知耶知則可無訓法
不知則不可無訓法近日爾等不惜身命善念切於
聖事可謂馬中天驥鳥衆丹鳳昨因赴會於瑤池聞
伏魔大帝之示訓於爾等又受大帝請我助訓故此
示蹟凡事一動一靜神明盡鑑皇天揔察無事不燭
恐懼戒慎君子之行悔過改非學者之步時覺昨非
進就今是今是之中又察今非今非之中又檢今是
毫毛動靜莫違古聖之垂訓時思大帝之苦口勿勞
我等開化之力勿塞我等教導之路爾等皆我等之

樞機也樞機一破則爾等進步之無何姑舍我等將
賴何而行化耶不惜天機之泄如是情訓情訓

定心篇

好善之士此心決不可無所主也無所主則見理不
真而志無定無所主則妄念不除而志無定然則好
善者欲志有定而此心果何所主哉夫亦曰孝而已
試思天以元亨利貞之氣賦人爲仁義禮智之性天
地之氣無息不與人通也父母秉天地之氣以生我
父母卽天地也我心卽天地也我惟背本忘親溺於

情涸其性斯理之用不行而心之體不彰人苟充此良知良能慕父母以終其身內竭其誠外盡其力妻子不能分其愛窮達不以易其心親有過必委曲以諫親之年頃刻不能忘和氣婉容愛敬交至欲報之德昊天罔極爲人子者卽或於孝無忝猶當以不孝自責矣况夫孝之量無不該非特移孝可以作忠也孝之理尤推之無盡非特惟孝友于兄弟也內而持已舉凡自逆其性者皆自外於性者也吾以孝爲閑無念不持以仁義禮智之心無事不持以仁義禮智

之心斯不失親之本性而孝德無虧外而接物舉凡受氣以生者皆吾同氣也吾本孝以推無物不在天地長養之中卽無物不在我心長養之中斯不失親之本來而孝思不匱故孝爲一心之主卽爲一生之主也好善者欲志有定何可不以孝爲行仁之本哉古聖人盡己性以盡人之性盡人性以盡物之性參天地贊化育亦不過不失其親之本來焉已矣

